



Tingim dai long Wol Woa 2

Praim Minista bilong Papua Niugini, Peter O'Neill i wokabaut i go long Wol Woa II Memoriel long Bomana Woa Semetri long putim plawa long Wol Woa II Memoriel monument long ANZAC De moning lotu long Tunde 25 Epril, 2017. Poto: Nicky Bernard.

Nominesen pas!

Paul Zuvani i raitim

ILEKTORAL Komisina Patilias Gamato i tok de bilong ol kendidet i nominet i pas tude.

Dispela i bihainim ol de komisen i makim long kamap bilong ol wok we bai kamap long 2017 llek-sen.

Husat man o meri i soim laik long resis long ileksen tasol i no nominet bipo long 4 kilok nau apinun i no inap resis long ileksen.

Gamato i mekim dispela tok long mekim klia olsem ol kendidet husat i laik resis i mas kamap ol yet na soim risit bilong pe

ol i mekim long nominet na ol pepa i soim pati we i endosim ol long sainim nem bilong ol.

Wantaim dispela em i tok ol politikal pati i mas endosim wanpela kendidet tasol long wanpela ilektoret.

Em i tok aninit long Organik Lo long Integriti bilong Politikal Pati na Kendidet (OLIPPAC) em i tok klia long pati i mas endosim wanpela kendidet tasol long ilektoret.

Gamato i mekim dispela tok bihain long sampela ripot we sampela pati i endosim moa long wanpela kendidet long wanpela ilektoret.

Em i tok Komisin i tok orait long ol nem bilong ol kendidet we ol publik opisa o jeneral seketeri bilong ol pati i givim.

"Dispela i mas kamap long Fom 30 wantaim nem bilong ol kendidet ol pati i endosim," Gamato i tok.

"Ol kendidet i ken go het, nominet na soim pati i endosim ol long Fom 23 we ol bai sekim long lista bilong wan wan pati we i endosim ol kendidet wantaim ol fom ol i salim i go long hetkwata we nominesen de bai pas long Fonde 27 Epril, 2017, (em long tude)."

I go moa long pes 2...

INSAIT

The Giluwe News



Pes 11

Bikpela pait long Is Sepik rijonal sia - P4

**Sevim K25
lo niupela**

Red-X phone



Lukim page 7 lo moa.



PNG Air
Yu Gat Sois

Bukim Tiket

7222 2151

Fri Kol: 16111

Onlain Bukim Tiket:
www.pngair.com.pg

Wokabaut raun bilong Australia Gavana Jeneral

AUSTRALIA Gavana Jeneral Sir Peter Cosgrove, long tingim Australia, Nu Silan De (Anzac) i mekim wokabaut bilong em long Papua Niugini long dispela wik.

Sir Cosgrove i kamap long kantri long Mande we em i kisim 21 gan salut long PNG ami.

Bihain long dispela em i go long Gavman Haus na bungim Gavana Jeneral bilong Bob Dadae long Konedobu.

Bihain long em i bungim Dadae em i go long Bomana Woa Semetri (matmat).

Em i bungim tu Praim Minista Peter O'Neill na Oposisen lida Don Polye.

Long Tunde, Anzac De Sir Cosgrove i go long moning lotu long Bomana Woa Semetri long 5 klok na bihain long dispela em i kisim helikopta na go long Isurava Memorial na Kokoda Stesin, Oro

provins na mekim luk-luk raun bilong em.

Isurava em maunten ples long ami bilong Australia i bungim ami bilong Japan long taim bilong woa na i gat bilip olsem em dispela taim

Australia ami i winim Japan ami long ol i no ken kalapim maunten na kisim Pot Mosbi bipo long ol i go long Australia.

Australia i givim bikpela luksave long dispela hap.

Long Pot Mosbi Gavana Jeneral i kamap long ol bung olsem netbol pilai na givim setifket long ol wina bilong Australia Awot Skolasip.

Long aste Sir Cosgrove i go long Milen Be long tingim 75 anivesari bilong "Batel bilong Milen Be."

Long dispela taim tu em i go lukim pilai graun bilong Turnbull na memorial bilong Milen Be na French VC.

Em i go bek long Australia long aste apinun.



Australia Gavana Jeneral Sir Peter Cosgrove i sekan wantaim Praim Minista Peter O'Neill.



Australia Gavana Jeneral Sir Peter Cosgrove (rait han) i sekan wantaim wanpela man husat i pait long taim bilong WWII. Sir Cosgrove wantaim ol arapela i kamap long 5 klok moning lotu long Bomana Woa Semetri au-sait long Pot Mosbi. Ol foto: Nicky Bernard



Australia Gavana Jeneral Sir Peter Cosgrove i toktok wantaim Gavan Jenerel bi-long yumi Bob Dadae.

Nominesen i pas

I kam long pes 1



James Kila i raitim

MOA long 100 kar na bas i pulim lain, karim ol manmeri wantaim bilas long bringim Madang Open kendidet Bryan Krammer i go nominet long Tunde long Madang.

Planti manmeri husat i lukim dispela lain kar na sapota i tok dispela em bikpela sapot stret long 2017 nominesen taim long Madang taun.

Ol i tok Kramer i gat bikpela sapot na em bai resis egensim nau memba na Minista bilong Petroleum na Eneji, Nixon Duban.

Long taim ol kar i pulim lain wantaim ol sapota wan-pela hap sait bilong rot long Modilon Rot i go long taun i pulap na pas long narapela kar i ken abrusim na go.

Krammer i resis aninit long Pangu Pati na long Tunde em i sanap long kar wantaim Madang rijinal kendidet na pastaim PNG Difens Fos komanda, meja jeneral (ritaia)

Long ol balot pepa em i



Ol sapota bilong Madang Open kendidet Brian Krammer i karim posta na pulumapim ol kar na go lukim em i nominet. Poto: James Kila

Jerry Singirok.

Krammer husat i wanpela dairekta bilong Youth Link i lukim ol sapota bilong em i kam olsem long Trans-Gogol, Not na Saut Ambenob na Madang taun i go wantaim em long soim sapot bilong ol.

Long ol arapela nius long provins Gavana Jim Kas em namba wan long nominet

long las wik Fraide long ban-isim sia bilong em.

Ol arapela kendidet husat bai sanap resis long Madang Rijonal em pastaim MP bilong Madang Alois Kingsley, Peter Yama, Jerry Singirok, John Kirakar, Steven Mavi Gimbo, Wesley Sanarup, Greg Tuma na Steven Asivo.

Long las wik Fraide yet biknem bisnisman na pas-

taim MP, Peter Yama i bin go nominet wantaim ol sapota bilong em husat i bilas na singsing na biahinim em long ol kar na trak. Yama em lida bilong Pipols Leba Pati (PLP).

Long 2012 Nesenel Ilek-sen, Yama i bin resis long Madang Open sia na i kamap namba tu long resis.

Namba 10 Inta-Dinominesnel Yut Weiv Reli kamap long Mosbi

Frieda Sila Kana
i raitim

MOA long 5,000 yangpela Kristen yut bilong ol sios insait long Pot Mosbi siti i bin bung long tripela nait long Sir John Guise Indoor Stadium stat long Fraide 21 Epril na i go pinis long Sande 23, we Scripture Union PNG i bin go pas long en.

Bikpela tok bilong dispela reli em, 'Be Real with God,' o long Tok Pisin em, 'Soim kala tru bilong God.'

Ol program bilong dispela yut reli i bin kamap long nait tasol i bin gat wanpela ek-tiviti we planti Scripture Union sumatin bilong ol haiskul na praimeri skul long siti i bin danis wanpela bung danis insait long ka pak bilong Visen Siti long Sarere 22 Epril stat long 9 klok moning i go pinis long 12 klok belo taim.

Insait long dispela bung ol sumatin i bin pre long gavman, kantri na long gutpela ileksen bai kamap we ol pipel bai votim ol gutpela Kristen manmeri long kamapim stretpela Kingdom Gavman.

Intadinominesnel Yut Wave Reli em i bin stat long 2014 long namba wan bung i kamap long Kristen Rivaivel Krused (CRC) sios, Bethel Tabernacle Senta long Tokarara.

Tupela o tripela taim long wanpela yia ol yut grup bilong ol sios insait long siti i save kam bung wantaim long tripela wiken de long lotu, singsing, pilai na

amamas long harim Tok bilong God. Wan wan sios yut i save holim long ol dispela taim tasol long las wiken em ol Scripture Union PNG i bin go pas long holim.

Bikpela visen bilong dispela Intadinominesnel Yut Reli em bilong strongim ol yut long 'strongim ol yu ministri na ol oge-naisesen long bungim tingting long helpim ol yut stap wantaim pret na pasin bilong God insait long Papua Niugini.'

Long tripela nait Sir John Guise Indoor Stadium i lukim ol yangpela i pulimapim olgeta sia insait long stadium na moa sia tu i kam long ol sios grup. Ol yangpela i singim song, danis, amamas, kalap, kalap na biahin ol i sindaun long harim Tok Bilong God i kam long

Bikpela tingting em long Bodi bilong Krais i mas bung wantaim na sanap wantaim long kamap nupela Papua Niugini.

ol Pasto husat ol yet i bin stap olsem memba bilong Scripture Union long taim ol i stap long haiskul bipo.

Ol man husat i bin autim gutnus em Reveren Jacob Harry bilong Poreporena Yunaitet Sios, Pasto Derrick Bension bilong Rabaul na Mista Naime, Siaman bilong Scripture Union PNG.

Ol lida bilong IYW i gat bikpela tingting long lukim ol yangpela Kristen man na meri long kirap na lainim pasin bilong God na ol i laik yusim ol stail bilong tude tasol wantaim Kristen pasin wantaim Tok bilong God long pulim ol yangpela i kam insait.

Ol ajenda olsem ileksen bilong ol bisop deputi, ol komiti siaman, ileksen bilong nupela presiden bilong Katolik Bisop Konferens bai kamap long kibung.

Katolik bisop bai holim kibung



Ol Katolik bisop bilong Papua Niugini na Solomon Ailan i kisim poto long Emmaus Senta, Don Bosco Teknolojikal Institut long Pot Mosbi. Poto: CBC

OL KATOLIK bisop bilong Papua Niugini na Solomon Ailan holim 58 anual jeneral kibung bilong ol long Pot Mosbi

long dispela wik.

Hettok bilong dispela kibung em long "Laikim, was na skulim gut ol pikinini bilong mipela".

Ges spika bilong dispela kibung em Asbisop Mark Coleridge, Asbisop bilong Brisben, Australia.

Inap olsem 24 bisop long ol daioses long Papua Niugini na Solomon Ailan bai kamap long dispela kibung.

Ol ajenda olsem ileksen bilong ol bisop deputi, ol komiti siaman, ileksen bilong nupela presiden bilong Katolik Bisop Konferens bai kamap long kibung.

Wan wan ol komisen olsem edukesen, helt na relijon bai kamap na givim ripot bilong ol wantaim ansa bilong ol hevi ol i gat na rot ol bai bihainim long stretim dispela ol hevi.

Toktok bilong klaimet senis na solwara maining bai sampela ol toktok ol bisop bai tok long em.

Tasol pastaim long dispela Katolik Bisop Konferens Jeneral Seketari Pater Victor Roche i tok bai gat sarap piksa we Mis Uma Ambi bai go pas long em. Long dispela em bai

kisim ol pikinini we ol ba go pas long ol bisop i go long konferens rum.

As Bisop Kurian Mathew Vayalunkal, Apostolik Nunsio i kam long PNG na Solomon Ailan bai go pas long lotute.

CBC bai holim wanpela fand resing apinun kaikai long Dynasti, Vision Siti long kamapim mani bi-long mekim nupela Kato-lik Bisop opis.

Husat manmeri i redi i welkam long kamap long dispela kaikai.

Long toktok bilong solwara maining Kardinal Sir John Ribat long tupela wik i go pinis i bin askim Gavman na projek di-velopa, Nautilus Minarel long ol i mas pasim maining projek we i kamap long solwara namel long Nu Ailan na Is Nu Britan provins.

Nautilus i mekim fisibiliti o wok stadi long rot em bai mekim wok.

Kardinal Ribat i tok bikos long projek ol manmeri long tupela provins i bungim hevi.



Scripture Union Flash Mob singim na danis "Every Praise," long Visen Siti long Sarere las wiken. Poto: SU fb page.



Need help to avoid impulsive spending? Protect and grow your money with a **TERM DEPOSIT**.

**We are the Bank
for Savings**

BSP



Bikpela pait long Is Sepik rijonal sia

Paul Zuvani i raitim

BAI gat bikpela resis long Is Sepik rijonal sia taim ol Is Sepik i go insait long de bilong putim vot long

24 Jun.

Dispela sia em 'Papa bilong Kantri' Gren Sif Sir Michael Somare i holim long las 49 krismas inap long tupela wik i go pinis taim em i ritaia long wok politik.

Sia bilong em nau em pravet loia Moses Murray, bisnisman Allan Bird, biknem bipo publik sevan Valentine Kambori na pikinini meri bilong Somare yet, Dulcie Somare i resis long kisim.

Olgeta i gat nem bilong resis tasol wapela bilong ol tasol we ol manmeri bilong Is Sepik i laikim bai kisim ples bilong Sir Michael.

Wankain resis bai kamap long ol arapela sia long kantri.

Long las wik Fonde Gavana General Bob Dadae i sainim na givim aut 111 rit we 89 i bilong ol distrik na 22 i bilong provinsial sia.

Long taim bilong sainim ol rit, Ilektoral Komisina Patilias Gamato i tok ol i no inap long putim posta bilong ol kandidet inap long ol manmeri husat i laik resis i nominet pastaim.

Long Nesenel Kapitel Distrik sia Gavana Powes Parkop bai resis wantaim planti ol arapela kandidet olsem Triumph Heritage pati kandidet na ekтивis Noel Anjo.

Long Nu Ailan rijonal em Sir Julius Chan we bipo rijonal memba na Nesenel Alaiens kandidet Ian Ling Stucky bai resis egensis em

na long Westen Hailans em bipo gavana Thomas Olga bai resis wantaim Gavana Paias Wingti.

Narapela sia we bai gat planti pait em Hela rijonal sia we bipo gavana Anderson Agiru i dai na lusim.

Dispela sia em Philip Undialu husat i memba bilong Koroba Kopiago tasol nau bai lusim na resis long em.

I gat ol arapela gutpela man husat bai resis tu long dispela sia em bisnisman Larry Andagali, bipo Ok Tedi Main sivil enjinia John Angawai na Raymond Kuai, wapela loia husat i hap famili bilong leit Anderson Agiru.

Long Bogenvil rijonal sia em Patrick Nisira husat deputy presiden long Atonomus Bogenvil Gavman em presiden John Momis i

sapotim long resis agensim Joe Lera, husat i rijonal memba.

Long Galp rijonal sia bipo Gavana Chris Haiveta bai traum gen wantaim Gavana Havila Kavo. Kavo i gat nem long pait long bringim developmen i go long provins tasol sampela opisa i gat bel hevi wei e mi wok.

Long Madang rijonal sia, resis bai stap namel long Gavana Jim Kas na ol arapela lain olsem bipo ami komanda na ritaia meja jeneral Jerry Singirok, bipo Madang Taun Edinistretta Greg Tuma na akaunten Steven Asivo.

Dulcie Somare, pikinini meri bilong Sir Michael Somare husat bai resis long kisim ples bilong papa bilong em long Is Sepik rijonal sia.



Tuma no inap mekim promis

Paul Zuvani i raitim

RESIS long ileksen na mekim tok promis long wok kamap e mi tok promis we olgeta kandidet i save mekim.

I no gat tok na asua long dispela na i gutpela long mekim olsem bikos dispela bai helpim ol vota long ol i ken save gut long kandidet bipo long ol i vot.

Tasol sampela kandidet i no save laik mekim tok promis olsem taim ol i go long

ileksen.

Wapela bilong dispela ol kandidet em Greg Tuma.

Tuma i tok em i no laik long mekim promis bikos stap bilong mani long kantri long dispela taim i no gutpela na sampela wok bai hat long mekim.

Long dispela em i ting em i no gutpela long brukim tok promis biahin long em i mekim.

"Maski gavman i paitim bros na tok em i kamapim planti wok tasol stap bilong ol manmeri i no senis," Tuma i tok.

"Mi lukim yet ol rot i bagarap na ol manmeri i



Greg Tuma, Madang rijonal kandidet.

no inap long go long ol maket na salim samting bilong ol, ol haussik i pas bikos no gat marasin na skul i no gat klasrum long

ol pikinini i ken stap na lain gut.

"I gat planti rot bilong kisim helpim olsem Memba i ken aplai na askim long ol dona kantri o NGO grup long kisim helpim arere long mani em i kisim long gavman long mekim wok."

Dispela rot Tuma i tok ol Memba i no laik mekim.

Em i tok em bai resis long Madang rijonal sia tasol manmeri yet bai skelim em long ol wok em i bin kamapim na vot long em.

"Sapos ol i votim mi, em mi amamas tasol ol i no votim mi, em i orait."

Tuma i tok bikpela samting long ileksen em ol manmeri i votim man o meri ol i laikim long em.

Em i sanap long resis bikos em i gat tingting long ol manmeri husat i stap long ol longwe ples.

Tuma i bilong Bundi na papagraun bilong Kurumbukari Ramu nikel main long Madang provins.

Em i bin wok pastaim olsem edministretta long Sauten Hailans provins bipo long em i kamap Madang taun menesa.

PRESIDEN bilong Seven De Adventis Sios long Papua Niugini, Pasto Kepsie Elodo i singaut long ol SDA Kristen long pre long gutpela ilseksen i mas kamap long 2017 Nesenel Jeneral Ilekseni.


Pasto Kepsie Elodo i tok Nesenel Jeneral Ilekseni em i impoten taim na sios i mas sapotim.

"Mi laik singaut long olgeta Seven De Adventis long pre long ileksen. Olgeta memba long sios i mas pre na God bai makim ol gutpela lida long ranim kantri bilong yumi," Pasto Elodo i tok.

Pasto Elodo i tok God i save sanapim ol lida long taim bilong em yet na em i save rausim ol gen, olsem na prea i mas kamap long dispela ileksen.

Emi tok sios i mas pre long ileksen taim bai i no gat trabel i kamap.

"Yumi mas pre long ileksen no ken gat trabel. Yumi i no laikim bai bagarap i kamap long laip na ol samting. Ol vota i mas rispekem wanpela narapela na Holi Spirit bai givim bel



Presiden bilong Seven De Adventis sios long Papua Niugini, Pasto Kepsie Elodo.

isis ol i nidim," em i tok.

"No ken stopim poling. Rispekem wok bilong ol skrutinia na ol arapela ileksen opisal. Sapotim na rispekem ol long ileksen proses bai biahin plen long kamap."

Em i tok tu long ol sios memba long no ken tromoi vot bilong ol long Sabat De

inun na i save pinis long taim san i go daun long de Sarere. Pasto Elodo i singaut long PNG Ilektoret Komisen long rispekem ol rait bilong ol Seven-de Adventis long larim ol i vot long ol narapela de na i no long Sarere. Em i tok lukaut tu long ol wanwan man huat i kamapim kros namel long ileksen long sios bilong ol i mas givim mekim save long ol. I gat moa long 294,000 Seven De Adventis wantaim moa long 1,000 lokal kongrigesen i stap long kantri nau.

URGENT!!

URGENTLY REQUIRE STREET SALES AGENTS & DISTRIBUTORS TO DO BULK SUBSCRIPTION OF WANTOK NIUSPEPA IN THE FOLLOWING LOCATIONS

Rabaul, Kiunga, Tari, Jiwaka, Manus, Wabag, Kavieng, Simbu, Tabubil, Lae, Mendi, Bulolo, Popondetta, Wewak, Vanimo and Kerema

Qualification:

No specific qualification is required, can be an individual, family, a retired worker or someone who is already engaged in doing News Paper contract work.

For more detail information please call
The Circulation Supervisor, Mr. Mark Timbi on Phone: 3252500,
mobile phone: 72703860/75690395 or
email: mtimbi@wantokniuspepa.com
circulation@wantokniuspepa.com

Kerema Jeneral Haus sik nidim helpim

PLANTI sikman na meri bilong Galp Provins i save kisim riferal na i go long Pot Mosbi Jeneral Haus sik bikos ol i no gat ol speselis dokta bilong ol yet long Kerema Jeneral Haus sik.

Sif Eksekutive Opisa bilong Kerema Jeneral Haus sik, Moses Uvaipi i tok ol namba ating bai senis nau bikos haus sik i gat wapelala sejen dokta long namba wan taim.

"Mipela aplai long kisim ol speselis tasol i no gat wapelala i kam. Nau mipela bringim wapelala nupela sejen i kam insait. Longpela taim em mipela i save salim ol pipel bilong mipela i go long Pot Mosbi Jeneral Haus sik. Ol i les pinis long mipela," Mista Uvaipi i tok.

"Inap 20 yia mi bin stap long hap olsem O & G speselis. Ating mipela i no mekim gut ples bilong ol i kam. Olsem mi stap 20 yia long hia em mi no kisim wapelala sapot bilong gavman," em i tok.

Galp em i provins we ples i no gutpela na ol rot i no gat long gutpela helt kea bai stap. i gat wapelala rot tasol em long Kerema taun i go long Pot Mosbi we ol kar i save ran 5 aua na sampela hap i no gat kolta.

Long dispela taim, ol Imejensi Rispons TB tim tokaut olsem Galp em i wapelala bilong ol tripela provins we i gat bikpela namba bilong Multi-Risisten Tubekulosis olsem na provins i mas mekim moa long kamapim gut helt sevis bilong

en.

Mista Uvaipi i no save hamas pipel i kisim marasin long MDR-TB pinis, tasol em i tok i gat 5-pela i stap yet insait long haus sik.

Em i tok ol TB sikelain i wankain tasol olsem ol narapela sikelain. Ol i save givim ol taim long stap insait long haus sik na bihain ol i save larim ol i go. Ol haus sik woklain i save ting bai ol i kisim ol marasin gut long kamap orait.

"Kerema Haus sik em i stap long mak bilong level 5 haus sik we em inap long gat 247 aninit long tok orait bilong Pesonal Menesmen tasol nau em i gat 22 bet tasol insait long haus sik na 166 wokman na wokmeri tasol," Mista Uvaipa i tok

Namba wan jeneral manesa bilong Word Publishing i dai

MAN husat i bin namba wan jeneral manesa bilong Word Publishing, Kevin Walcott, i bin dai long Canberra Australia long dispela mun.

Wantok Niusepa i sori long harim dispela nius bikos Kevin Walcott i wanpela bilong ol dispela namba wan lain husat i bilip olsem yumi ol PNG yet i ken raitim nius na pablisim niuspepa bilong yumi na go pas long wok bilong ranim kampani. Na em i bin strongpela sapota inap taim em i lusim PNG.

Kevin Walcott i bin kam long PNG olsem wapelala SVD pater long 1971 samting we em i bin wapelala Inglis tisa long Sogeri Nesel Haikul.

Bihain long wok tisa long Sogeri, em i bin komunikesen seketeri bilong ol Katolik Bisop long 1974.

Em i bin go pas long kirapim Word Publishing long 1976 samting na i mekim wok bilong bringim Wantok Niusepa long Wewak i kam daun long Pot Mosbi long na kirapim tu ol narapela pablikesen bilong sios.

Em i go pas long toktok wantaim ol Luteran, Angliken na Yunaitet sios long bung wantaim Katolik sios na kamapim ol dispela pablikesen.

Long dispela taim bipo long independens na bihain tasol long independens ol pipel long kantri i hangre long ritim nius na

ol toktok bilong gavman na save moa long wanem kain ol samting i kamap long ol ovasis kantri tu.

Word Publishing i bin pablisim Wantok Niusepa, New Nation, The Times na sampela arapela liklik pablikesen tu.

Bihain long Kevin Walcott i lusim Word Publishing em i bin go stap long Fiji na mekim wok bilong komunikisen bilong ol Kristen sios long Pasifik.

Em i bin lusim wok pater na i go stap long Australia long Canberra inap long em i dai long April 12, 2017.

Planti ol studen na ol lain husat i bin wok wantaim Kevin Walcott i sori long harim olsem em i dai. Em i bin wapelala gutpela pren na tisa bilong ol Papua Niugini.

Tambul-Nebylyer studens i baim nominesin fi na endosim kendidet bilong ol

MY Media & News Agency i raitim

MOA long 2,000 sumatin bilong Tambul-Nebylyer distrik insait long kantri na ovasis i baim nominesin fi na endosim Gabriel Andandi olsem wapelala kendidet bilong Tambul-Nebylyer Open Sit long 2017 eleksen.

Moa long 70 sumatin i bin kamap long Tambul stesin insait long WHP na baim nominesin na endosim Gabriel Andandi long ai bilong Riting Opisa (RO), Philip Kansol.

Mista Kansol i tok bikpela welkam long ol sumatin na Mista Andandi olsem wapelala fest kendidet long putim han-mak long nominesin fom.

Ol sumatin i bin kamap wantaim dispela tingting long nominetim na baim fi

bilong Gabriel Andandi bihain long planti bilong ol i bin kisim bikpela helpim long skul fi long Gabriel start long 1997 i kam inap nau.

Mista Andandi i gat Masta Digi na i bin wapelala tisa bipo na bihain em i bin wok wantaim UN. Tude em i wapelala bikpela bisnisman long kantri.

Ismael John long Madang Tisa Koles i makim maus bilong olgeta meri sumatin i tok Gabriel i kamapim gutpela tingting long helpim ol sumatin na tu long kirapim ol planti save meri long distrik we ol meri tu i ken soim tru olsem ol i ken wok na kisim save olsem ol man.

"Sapos mi win bai i gat bikpela luksave long edukesen bilong ol pikinini Tambul-Nebylyer na ol papa na mama i mas save gut long dispela," Mista Andandi i toktok.



Madang Tisa Koles sumatin bilong Tambul-Nebylyer, Ismael John i sainim fom long nominetim Gabriel Andandi makim olgata sumatin bilong Tambul-Nebylyer insait long kantri na ovasis.



Ileksen 2017 kempen long Goroka na Isten Hailans em i wok long i go het gut. Tasol sampela lain i wok long kamapim ol bagarap long ol posta na ol bilbos olsem dispela piksa bilong Gavana Julie Soso na Praim Minista Peter O'Neill i soim. Poto:Loutova Siapea

Ileksen opisa tok Kerowagi nominesen bai pinis gut

Paul Zuvani i raitim

ILEKSEN menesa bilong Chimbu Tom Sine i tokim Wantok Niusepa olsem wok bilong nominesen long Kerowagi ilektoret bai pinis gut.

Nau apinun long 4 klok nomine sen i pas na husat man o meri i rejista long nominet na resis long 2017 ileksen i mas kamap bipo long dispela taim na nominet.

Sine i mekim dispela tok bihain long nius i kamap long wapelala man i dai na ol arapela manmeri na ol samting i bagarap taim ol sapota bilong tupela kendidet i pait long ol yet long Kerowagi.

I gat ripot long ol sapota bilong wapelala kendidet i pasim na bagarapim memba Camillus Dangma wantaim ol sapota bilong em na ol kar ol i ran i go long nominet.

Bekim long dispela ol sapota i sut long gan na wapelala sapota i dai na bagarapim tu ol sapota bilong narapela kendidet husat i pasim ol.

Long kisim bekim bilong dispela nius Wantok Niusepa i bin salim tok i go long opis bilong Ilektoral Komisina Patilias Gamato na Polis Komisina Gari Baki tasol i no bin inap long bekim.

Opis bilong Baki i tok ol i no kisim gut yet ripot long Kundiawa polis long ripot bilong dispela hevi na olsem ol i no redi long mekim wapelala toktok.

Tasol Sine i tok maski ripot long dispela hevi i kamap, opis bilong em bai lukim wok bilong nominen i pinis gut long nau apinun.

Em i tok long Tunde apinun yet ol opisa bilong em na polis i bung

na holim wapelala kaises (crisis) kibung long Kundiawa na toktok long dispela hevi.

Em i tok ol i salim pinis inap polis man long Kerowagi long banisim hevi long i no ken kamap bikpela.

Bipo long dispela hevi i kamap 10-pela kendidet i nominet pinis long resis long dispela sia

Sine it ok arere long dispela ripot nominesen long ol arapela ilektoret long provins i kamap gut.

Long ol arapela nius long Hailans rijon i gat ripot long Sauten Hailans we i tok sampela lain i bagarapim ol kar bilong Sauten Hailans Gavana William Powi na Memba bilong Nipa-Kutubu Jeffery Komal taim tupela i ran i go long Nipa.

Bihamim dispela ripot polis i hariap long go long Nipa stesin na was long ol samting bilong gavman

Ol opisa bilong Koreksenel Imejensi Rispons

Tim long PNG Koreksenel Sevis i bin bung long Ista wiken na holim kem long trening koles bilong ol long ol i redi long 2017 Neselen ileksen.

Samting olsem 120 opisa bilong ol koreksenel institusen i kamapim tripela platin we bai kamap hap bilong bikpela sekyuriti lain we bai lukautim ol wok bilong ileksen taim ol ileksen i stat long las wik.

Koreksenel Sevis Deputi Komisina bilong Operesen, Dennis Piandi i tok welkam long ol opisa long Tunde las wik na em i tok lukaut long ol olsem wok long dispela ileksen bai gat bikpela hat-wok.

"Tasol yumi olgeta i save olsem dispela kantri i wok long gat hevi bilong mani na em bai hat olsem na mi givim yupela tok lukaut long yupela olsem em

bai hat," em i tok. Em i toktok tu long disiplin na wok bilong ol opisa long taim bilong ol i stap long ileksen.

"Bikpela samting em disiplin. Long bipo yumi save wok bung wantaim, ol polis, soldia na yumi tasol nau em i narakain. Olsem na yumi gat salens long soiim trupela kala bilong yumi wanem kain man. Yumi mas soim olsem yumi ken mekim gut wok olsem ol narapela taim na apim nem bilong CS. Dsipela em i taim bilong traim, tasol redim yupela yet," em i tok.



Ol koreksenel Sevis CERT memba i kisim pareid long taim bilong briefing long CS Trening Koles.

Polis holimpasim tupela raskol man bringim gan long balus

POLIS long Madang long 9 klok long Sande moning, April 23 i holimpas tupela man bihain long tupela hait na laik bringim wan-pela M16 masin gan long raun bilong balus long Boram ples balus i go olsem long Madang.

Madang Provinseal Polis Komanda, Suprindenten Jacob Singura i tok polis i bin kisim infomesen i kam long ol wokman bilong PNG Air long Boram ples-balus bihain long ol i painimaut olsem kago bilong dispela tupela man i gat M16 masin gan we i no gat laisens long en.

Ol wokman long givim infomesin long polis tu olsem tupela man i karim wanpela Sig pistol wantaim ol long balus i go olsem long Madang.

PPC Singura i tokaut long nem bilong dispela tupela em Albert Luke Taku na em bilong Malaguna namba wan viles long Rabaul, Is Nu Briten provins. Narapela poroman bilong em we polis long Madang i holimpas em Gibson Saun na em bilong Korogu viles long Ambunti-Drekikir distrik long Is Sepik provins. Saun i save stap long Niugo setelmen long Wewak taun.

Supridenten Singura i tok Albert Luke Taku em wanpela biknem saspek em polis i wok long putim was long Madang.

Sevim K25 lo niupla RED-X phone

RED-X + free SIM + K7 moa wik lo liklik taim tasol.

Baim long ol bmobile-vodafone stores na agents.

PORT MORESBY

Head Office | Domestic & International Airport
Vision City | Waterfront-Foodworld | Koki Market

LAE

Post PNG Building

MT. HAGEN

Post PNG Compound

GOROKA

Bird of Paradise Hotel Suite 17

MADANG

Ela Emporium



Special offer
K46



www.bmobile.com.pg

76003555 or 1555
connect@bmobile.com.pg

The Giluwa Nius

To contribute to this page, contact MY Media & News Agency on mobile: 70747450

Gabriel Andandi em nambawan kendidet long baim nominesin fi

GABRIEL Andandi em i bin kamap nambawan kendidet long peim nominesin fi bilong em long dispela wick Mande Epril 24 long kontes long Tambul-Nebyler open sit long dispela eleksen.

Moa long 2,000 manmeri i bin kamap long Tambul stesin long witnesim dispela nominesin. Moa long 2,000 sumatin bilong Tambul-Nebyler i bin endosim Mista Andandi na baim fi bilong em tu bilong wanem ol i luksave olesem Andandi i save baim skul fi bilong olgeta sumatin bilong Tambul-Nebyler stat long 1997 i kam tude.

Taim Mista Andandi i givim toktok bilong em long moa long 2,000 pipel long Tambul stesin, em i tok klia olsem as tingting bilong em long baim skul fi bilong ol sumatin bilong Tambul-Nebyler bai i no inap stop maski sapos em i lus long eleksen.

"Sapos mi win, bikpela mani baset i mas go long edukesin bilong ol pikinini," Mista Andandi i toktok.

Olgeta sumatin bilong Tambul-Nebyler insait long kantri na ovasis i endosim Gabriel Andandi na peim nominesin fi bilong em.

Ismael John, sumatin long Madang Tisa Koles i makim olgeta sumatin na sainim endosmen o nominesin fom long ai bilong RO (RO), Mista Philip Kansol.

Bikpela toktok Gabriel i givim em i tok olsem ananit long lidasip bilong em, i mas i gat ol bikpela skul man na meri insait long Tambul-Nebyler na kantri. Long dispela as tasol em i bin stat long helpim ol sumatin long 1997 i kam inap tude na em i bin yusim moa long K5000,000. Plantol sumatin i bin kisim helpim long em i kisim ol bikpela wok long kantri olesem loya, dokta na ol narapela.

Plantol manmeri i kam long Lowa Kagul, Upa Kagul, Lowa Nebyler na Upa Nebyler long witnesim dispela nominesin i bin kamap.

Gabriel Andandi em i feskendidet long putim han mak long nominesin na em i bin namba wan kendidet tu long putim Fom 29

long ilektrol komisin.

RO, Mista Kansol i tok welkam long Mista Andandi we em i namba wan man long putim han mak long givim nominesin bilong em na tok God tasol i ken kamapim na makim gutpela lida bilong distrik.

Taim Mista Andandi i givim toktok bilong em long moa long 2,000 pipel long Tambul stesin, em i tok klia olsem as tingting bilong em long baim skul fi bilong ol sumatin bilong Tambul-Nebyler bai i no inap stop maski sapos em i lus long eleksen.

"Sapos mi win, bikpela mani baset i mas go long edukesin bilong ol pikinini," Mista Andandi i toktok.

Olgeta sumatin bilong Tambul-Nebyler insait long kantri na ovasis i endosim Gabriel Andandi na peim nominesin fi bilong em.



Gabriel i mekim toktok bihain long em i sainim nominesin fom bilong em.



Gabriel Andandi i sainim nominesin fom bilong em taim RO, Philip Kansol i lukluk.



Ol sumatin i kisim Gabriel i go long sainim nominesin bilong em.



Ol lida man long Mundika na Gaulga Traib long Lowa Kagul i mas na kisim Gabriel i go long sainim nominesin bilong em.



Norman Finance Limited

P.O. Box 891, Waigani, National Capital District
Phone: (675) 326 3281, Fax: (675) 326 3281
Email: gandandi@hotmail.com

A Subsidiary of Universal Service Limited



Interest rates are reasonable:

We offer
Low Interest Rates
Efficient Services
No Service Fees
No Default Fees
No Processing Fees
Rebate on Early Settlement
Service within 36 Hours

GST#
18351

Tok klia na tok tru em i hanmak bilong ol trupela lida

NOMINESEN i op na taim bilong kempen long 2017 nesenel ileksen i stat nau. Ol kandidet na ol memba tu i wok long strongim kona bilong ol long kisim sia long palamen.

Long taim nominesen i op long las wik Fraide, ol striit bilong Pot Mosi i lukim ol kandidet na ol sapota bilong ol i haia long ol bas na PMV na pulim lain long siti i go long putim nem. Ol polis i tok save olsem ol kandidet na sapota i no mas mekim olsem tasol dispela toktok bilong ol polis i go lus natting. Ol kandidet i mekim long laik bilong ol.

Ol pipel i no klia tumas long wanem kain sevis wan wan memba i mas mekim na hamas mani nesenel gavman i save brukim long baset long kamapim ol dispela wok long ilektoret. Ol i ting mani bilong wokim klasrum o haus bilong tisa o klinik o rot na bris em i kam long poket bilong memba. Tasol dispelai no tru. Mani bilong ol dispela samting em i stap long skel wan wan memba i kisim long nesenel gavman.

Sampela memba i save mekim wok tru na yusim mani long kamapim ol samting. Ol arapela i save pasim mani i stap na tromoi liklik pipia long wanpela klasrum o sotpela han rot o ol liklik wok long giamanim pipel.

Ol i pasim mani i stap inap klostu long ileksen nau na ol i ka-



mautim na hariap hariap long wokim ol klasrum o baim sios trak o embulens na ol kain samting olsem.

Yumi lukim ples klia long las tupa mun ol memba i wok long opim ol nupela klasrum na skul na etpos na rot.

Dispela em ol gutpela samting bilong helpim ilektoret na ol pipel. Tasol i mas gat klia tok save tu olsem mani bilong wokim ol dispela samting i kam long pravet akaun bilong memba yet.

I gat ol edvetaismen i wok long kamap long televisen na ol posta tu i ken paulim ol pipel. I no gat lo

baset bilong kantri na skel bilong memba em i yusim long givim dispela sevis i go long ol pipel.

Pasin bilong tok tru na tok klia em i bikpela samting na lida tru i mas soim ples klia dispela pasin. I no ken haitim na mekim ol pipel i ting mani bilong wokim ol dispela samting i kam long pravet akaun bilong memba yet.

I gat ol edvetaismen i wok long kamap long televisen na ol posta tu i ken paulim ol pipel. I no gat lo

bilong gavman i tok klia long pasin bilong putim ol ileksen edvetaismen long TV na ol arapela pablik ples. Olsem na ol edvetaismen i isi tru long paulim pipel long wok ol memba i mekim o ol wok nupela kandidet i promis long mekim.

I kam inap nau, i no gat ples we ol pablik dibet wantaim ol siting memba o ol nupela kandidet i ken kamap.

Olsem na ol pipel i no klia long wanem kain wok memba i bin

mekim pinis na wanem kain wok ol nupela kandidet i ken mekim. Long ol taun na siti, ol kandidet i ken toktok wantaim ol nius lain na putim stori bilong ol long pablik. Sapos ol i gat inap mani ol i ken baim spes long niuspepa na televisen o redio long autim polisi bilong ol.

Ileksen kempen i stat pinis na bai yumi wok long lukim ol strongpela salens i kamap namel long ol memba na ol nupela kandidet. I gat ol gupela lida i stap na inap long mekim gutpela wok bilong lukautim ilektoret.

Em i wok bilong ol vota long skelim gut ol dispela kandidet na givim 1, 2, o namba 3 long ol. Pasin bilong givim vot long dispela rot i soim ples klia husat kandidet moa pipel i laik bai makim ol long palamen.

Ol vota i mas klia tu long pasin bilong vot. I gat kain kain toktok i kamap bikos ol vot pepa em ol i printim long Indonesia. Bai ol vot pepa i wankain olsem bipo o i gat sampela liklik senis i stap. Sapos i gat ol senis orait, mobeta Ilektoral Komisin i tok klia long ol pipel nau na ol i klia gut na redi tasol long vot.

Ileksen wok em i bikpela samting na yumi wan wan tu i mas luksave na i no ken kamapim ol hevi we inap long bagarapim nating ol gutpela wok redi bilong Ilektoral Komisin.

Gutpela mi bilip mi ken kamapim senis



em olsem mipela i ken harim tok na senis.

Dispela i min mipela inap senis long luksave long i gat trupela laip, laip bilong harim tok na kamapim gutpela sindaun.

Wanpela i mas save olsem em i no driman olsem em stap. Nogat. Em i tru olsem wanpela i stap.

Mi gat laip, mi gat bodi, spirit, gat tingting na i ken kamapim ol wok.

Taim wanpela i mekim olsem wanpela i ken lukim senis long em yet, famili bilong em, komuniti, provins na kantri wantaim.

Tasol taim wanpela i no senis na no rispekem em yet, stil na bagarapim laip na ol samting bilong pablik na bilong ol narapela manmeri i ken bagarapim sindaun bilong wanpela, ol lain manmeri i stap wantaim em na komuniti em i stap long em.

mani mak bilong kain pasin i bikpela moa.

Planti i winim mani mak bilong kamapim ol haussik, baim marasin, kamapim ol skul na rot.

Planti toktok i kamap long pait egenism kain pasin nogut tasol i luk olsem ol manmeri husat i stap long ol bikpela opis we i save mekim ol disisen i no senis.

Mipela i wari na mipela i askim 'Mi ken bilip long mi yet o nogat'?

Sapos mipela i ken bekim olsem mipela i ken bilip orait

Long sampela taim i go pinis mipela i harim Transperensi Intanesenel i askim Gavman long no ken toktok long kamapim ol wok we manmeri long kantri i no pas tasol i mas pait egenism pasin korapsen we em i save lusim nating mani long em.

Moa yet em i tok long taim kantri i wok long bungim hevi bilong mani, Gavman i tok long stretim Pot Mosbi Intanesenel Jackson Airport.

Transperensi Intanesenel na olgeta manmeri i laikim i mas yusim mani long ol wok olsem helt, edukesen, rot na lo na oda.

Em dispela ol wok gavman i tok em i sapotim na olsem em i mas go het yet long sapotim gut.

Em i gutpela Gavman na ol bikpela opisa i mas gat bilip long ol yet na kamapim gutpela senis long wok bilong ol na kantri.



Published Weekly, Thursday, for Word Publishing Company, Ltd.

P.O. Box 1982, Boroko, NCD

Papua New Guinea

Telephone: (675) 325 2500

Fax: (675) 325 2579

Email: editorial@wantokniuspepa.com

**Pe bilong wanpela yia
52 niuspepa**

Ples:

PNG

AUSTRALIA

ASIA PACIFIC na JAPAN

AMERICA na EUROPE

Air:

K220.00

US\$110.00

US\$150.00

US\$210.00

General Manager

Elizabeth Konga

Editor

Frieda Sila Kana

Printed and Published at:
Dove Travel Building,
Level 2.; Section 24, Lot
25, Angau Drive/ Lahara
Avenue Junction, Boroko

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

SAVE na MEKIM

Sapta 2

...moa yet long hap 1 (KON)
Kaikai bilong givim strong

KON (MAIS)

MEKIM WANEM LONG KON

Kaikai nupela kon em i gutpela tru. Nupela kon i gat planti liklik protin (dispela samting bilong helpim budi i kamap bikpela), na planti liklik vaitamin (dispela samting bilong was long sik.) Na sapos yu kisim kon taim em i nupela yet na lip bilong em i no drai yet, orait, givim stik wantaim lip i go long pik o kau bilong yu.

Taim kaikai bilong kon i drai pinis, bai em inap i stap longpela taim. Em i gutpela kaikai bilong man na bilong abus. Tasol em i hatwok long kisim pikinini bilong en na i hatwok long brukim, olsem na mipela i laik tok long tupela tul pastaim.

Masin bilong tekewe pikinini kon

Yu ken baim long stua. Dispela akain masin bai i helpim yu gut long tekewe pikinini kon, sapos yu gat planti drai kon. Lukim long poto.

1. Liklik masin bilong tekewe pikinini kon. Pasim long tebol o long wapelapla plang. Tanim long han.

2. Bikpela masin bilong tekewe pikinini kon. Em yet i sanap. Tanim long han. Nau long dispela taim mi no save lukim long ol stua.

Tasol nogut yu tromoi mani bilong yu i go long stua. Yu yet inap wokim wapelapla liklik tul bilong rausim pikinini kon. Em i luk olsem:

Poto: Liklik tul bilong tekewe pikinini kon. Em i wapelapla strongpela plang. Ol i boaim 4-pela hul.

Masin bilong brukim kon
Dispela masin ol i kolim grainda. Em i no bilong brukim kon tasol, em inap brukim rais na sogom na drai kaukau tu. (lukluk moa long dispela tul bihain taim)

Tok bilong brukim kon
Sapos kon i drai gut na yu no brukim, bai inap i stap gut longpela taim. Sapos yu brukim pinis, bai em i no inap i stap gut winim planti de.

Olsem na yu mas brukim inap long skel bilong tripela o fopela de tasol. Sapos dispela i pinis, orait, brukim narapela gen.

Kames G. Kila i raitim

MARIMARI Luteran Sios bilong Evanjelikol Luteran Sios bilong PNG (ELC-PNG) long Mauban viles long Madang i kamap olsem haus lotu we i lukim dedikesin o blesing bilong nupela komanda bilong Beon Koreksinel Sevises (CS), Sif Inspekte, Kosia Ban.

Dispela spesel dedikesen o blesing i bin kamap long Ista Sande, Epril 16. Pastor Dora Yawa, Senia Pasto bilong ELC-PNG long Memorial Luteran Sios i bin go pas long blesing bilong Sif Inspekte Ban.

Sif Inspekte Ban em bilong Umun viles long Trans-Gogol LLG long Madang na em i bin sevim dipatmen moa long 42 ya.

Sif Inspekte Ban long ol mun i go pinis i bin kamapim planti gutpela riabilitesin wok wantaim long ol lain i kisim taim long haus kalabus. Sampela ol dispela riabilitesin



Beon Jail Komanda Kosia Ban i kisim blesing long Pastor Dora Yawa bilong Memorial ELC-PNG Luteran Sios long Madang long Ista Sande. Poto: James G. Kila

program i lukim ol kalabus lain i go aut long komyuniti long mekim lotu na serim Tok bilong God na autris.

Sif Inspekte Ban i strongim wok bilong edukesin bilong sam-pela kalabus lain i go skul long prameri na sekenderi skul long Madang.

Pasto Dora Yawa i mekim beten antap long Sif Inspekte Ban long em bai strongim wok bilong em na tu sanap strong long Kristen bilip bilong em long lukautim ol Kristen manmeri long haus kal-

abus. Bihain em i kisim blessing, Sif Inspekte Ban i givim planti strongpela salens tru long ol yangpela man meri long Amele eria long no ken brukim lo na stap gut na sevim komyuniti bilong ol wantaim Kristen bilip.

Em i tok strong long ol yangpela bilong Amele long no ken dring hombru o 'yawa' na smuk mariwana na kamapim trabel insait long komyuniti.

Em i tok olsem planti taim em i save sem tru long lukim ol lain bilong Amele i go kalabus

long pasin bilong dring yawa na mariwana.

Em i tok bipo long taim bilong em i bin gat seif na gutpela pasin i stap.

Em save wokabaut long Umun go olgeta long taun long skul long Tusbab hai skul.

Namel long rot ol lain yangpela save bungim em na tok halo na tok welkam tasol.

Dispela pasin tude em i no moa stap bikos long pasin bilong ol yangpela man i dring yawa na ekting olsem 'ain man' na 'kapa man' na kamapim trabel nating nating.

Mama Yapet inapim mak bilong wokmeri

Paulus Tali i raitim

MOA LONG 30 yia long wok bilong ol meri insait long ELCPNG Lae siti seket, em i bikpela tru. Mama Yapet Barry, em i kamap log mak we em i lukim olsem, em i taim bilong putim wok long han bilong ol yangpela meri long karim wok Gutnius i go moa.

Malahang lotu senta bilong Ridima Paris, Lae siti seket bilogn ELCPNG Yabem distrik, i bin luksave long wok bilong mama Yapet na tok gutbai long em long krismas 2016. Mama i bin karim em long 1952 na bihain em i lusim ples bilong en Qarangko insait long Finschhafen na kam long Lae. Em i bin marit long 1973 - em i gat 3pela pikinini wantaim 7pela tumbuna.

Taim em i lusim Finschhafen, em i kam statp olgeta long Malahang Lutheran Development Sevis senta insait long Lae. Mama Yapet i tok, em i bin statim wok mama long yia 1980 wantaim ol

insait long wokmisin bilong ol, ol i save mekim wok long helpim ol manmeri, mekim Baibel stadi na arapela wok bilong helpim ol Kristen manmeri long olgeta ples ol i save i go na visitim ol na stap wantaim ol.

Long dispela taim em i sindaun na skelim wok bilong ol mama em i lukim olsem, wokmeri i no ran gut long mak bilong en. Em i i tok, "Long dispela, mi gat bikpela sori na mi wari tru. Planti ol mama i no sanap strong long karim wokmisin i go long planti hap na autim Gutnius i go long olgeta manmeri."

Em i tok, sapos ol meri i laik mekim dispela wok, ol i mas sanap strong, daunim ol yet na wanbel long mekim dispela gutpela wok bilong God long ol pipol. "Bilong wanem na bel bilong mi i kirap long mekim wok manma long laip biong? Taim mi kam long Lae siti, wok bilong ol mama i no bin ran long mak bilong en

olsem na mi bin promis long sanap wantaim na sapotim na strongim wok bilong ol mama. Mi statim wok mama bilong mi long Malahang lotu senta insait long Ridima Paris na go long arapela senta na mekim wok mama."

"Nau mi amamas long lukim olsem, narapela yangpela mama i ken helpim mi long wok mama olsem na mi mas amamas na lusim wok long han bilong em," em i tok.

Nau bai narapela wokmeri Jane Songom bai kisim wok long han bilong em na karim i go. Mrs Songom em i kam long ELCPNG Boana distrik.

Malahang lotu senta i tok amamas long mama Yapet long planti wok em i bin mekim long taim bilong en.

Ol i givim sampela presen wantaim K300.00 belgut mani long soim amamas bilong ol. Long wanem, Gutnius em i strong bilong God long kisim bek olgeta manmeri husat i bilip.



STORI TASOL
wantaim
Fr Paul Liwun

OL I LUKIM GOD LONG MI

I gat wanpela yangpela boi i wetim bas long Waigani bas stop. Em i laik go long daun taun Pot Mosbi.

I no longpela taim, em i lukim wanpela lapun i wokabaut i kam long bas stop. Lapun man i pulap long swet na i luk sleek olgeta.

Pilim sori long lapun man, yangpela boi i bin holim wanpela botol tru tru wara, i givim long lapun na i tok: "Papa, yu dringim dispela wara".

Lapun man i hapim het na lukluk strong long yangpela boi i givim wara long em. Em i kisim wara na dring stret. Em i pilim sot win tru long wokabaut i kam long bas stop.

Bihain long dringim wara, lapun man i lukluk long ai bilong yangpela boi na i tokim em; "Tenkyu tru Son! I gat sampela gutpelas man i stap yet namel long bisi siti olsem Pot Mosbi. Planti yangpela man na meri dispela taim i no wari long mipela lapun moa. Planti i no soim rispek long mipela lapun moa".

Bihain lapun i askim yangpela boi gen: "Bilong wanem yu mekim gut long mi? Bilong wanem yu givim wara bilong yu long mi. Yu baim dispela wara bikos yu laik dring. Tasol nau yu givim mi. Bilong wanem?"

Yangpela boi I smail na i tok: "Papa! Dispela em i samting nating ya! Mi wokim olsem bikos sampela lain i bin mekim gut long mi pinis. Ol i bin pulim mi aut long ples tudak na nau mi stap long ples tulait. Bipo, mi wanpela drag bodi.

Mi save dring stim, pulim maryuana na wokim hambak pasin long ol meri na stilim planti samting bilong ol narapela manmeri. Tasol, wanpela de, wanpela man i bin bungim mi na toktok gut long mi. Mi no bin

save long em. Tasol em i helpim mi streng na i senisim laip bilong mi.

Mi bin harim tok na bihainim wanem samting i gutpela em i bin tokim mi long wokim.

Wanpela tok em i tokim mi na dispela tok i save mekim nois long yau bilong mi i olsem: 'Sapos yu kontinu long wokim dispela pasin, yu bai stap long ples tudak olgeta taim inap long indai bilong yu. Bi-hain long indai bai yu stap yet long ples tudak oltaim oltaim.'

Tasol sapos yu senis na mekim gut long narapela manmeri, ol i bai lukim LAIT na moa moa yet ol i bai lukim GOD INSAIT LONG YU'. Dispela tok i save kamap long yau bilong mi olgeta taim".

Lapun i bekim tok bilong yangpela boi: "em i tru! Yu mekim mi amamas na kisim strong long wara yu givim mi. Tasol moa moa yet, nau mi lukim GOD I STAP INSAIT LONG YU!"

Wokabaut bilong Gavana Jeneral bilong Australia, Sir Peter, John Cosgrove, AK, MC, (Retd) long Pot Mosbi.

Em i bin kam long Pot Mosbi long Mande 24 Epril na i go bek long Trinde 26 Epril.



Gavana Jeneral bilong Australia, Sir Peter Cosgrove i kamap long Jackson's ples balus na i kisim welkam wantaim PNG Difens Fos Komanda.



Sir Peter Cosgrove i sek han long Minista bilong Spots na Nesenel Ivens, Justin TKatchenko taim em i kamap long Jackson ples balus long Pot Mosbi. Hai Komisin bilong Australia i wet i stap long holim han bilong GG tu.



Gavana Jeneral bilong Australia i go soim pes long nupela Gavana Jeneral bilong Papua Niugini insait long Gavman Haus long Mande 24 Epril.



Sir Peter, John Cosgrove, Gavana Jeneral bilong Australia i sainim nem bilong em insait long Visita Buk bilong Gavman Haus long Mande apinun taim em i go bungim Gavana Jeneral Bob Dadae.



Sir Peter Cosgrove wantaim meri bilong em i wokabaut insait long Bomana Woa Semetri wantaim Het ov Australia Difens Fos long Australia Hai Komisin biahin long moning lotu bilong ANZAC de long Tunde 25 Epril.

Ol foto: Nicky Bernard.

OI mama Haiti sutim tok long UN



Wanpela UN pis kipa i sambai long ol pipel husat i wet long kisim kaikai na marasin long Hinche taun long Haiti.

WANELA grup long Haiti i sutim tok long Yunaitet Neses (UN) i no laik helpim ol long kisim sapot bilong baim ol mama husat i karim ol pikinini bilong ol UN soldia husat i bin go mekem wok bilong pis kiping long Haiti.

Ol loya husat i makim 10-pela meri long Haiti i laik kotim ol dispela man tasol ol i tok ol i nidim sapot bilong UN bikos ol papa i lusim Haiti pinis.

Bureau des Avocats Internationaux (BAI), wanpela lo kampani long Haiti, i bin rait i go long UN long mun Ogas na askim long ol risal bilong DNA test bilong sampela bi-long ol dispela meri. Mario Joseph, manesing loya bilong BAI i tok ol i salim dispela pas i go long foren ministri bilong Haiti long givim i go long UN, tasol ol i no kisim wanpela bekim inap nau.

"Laip bilong ol dispela meri i nogut tru," Joseph i tok.

"I gat moa long 6-pela husat i stap long saut Haiti; Hariken Matthew i kamapim bikpela bagarap tru long saut. Sampela i no gat haus,

ol i traimego stat wantaim ol famili na ol i askim long kaikai bilong bebi."

UN stebilaisesen misin long Haiti (Minustah) i tok ol i wok wantaim foren afeas ministri bilong Haiti long ol dispela hevi na i wetim moa infomesen i mas kam long wanpela bilong ol dispela mama.

Dispela bekim bilong Minustah i tok, "Minustah, i wok long lukluk long ol rot bilong helpim ol dispela lain. Eksampel, em i wok wantaim sampela UN ejensi long painim haus bilong wanpela bilong ol dispela mama em loya bilong em i bin askim long nem bilong em.

"Sapos wanpela wokman bilong UN i brukim lo na meri i gat bel na karim pikinini, bai UN i mekem wok long stretim ol pepa long kisim sapot bilong papa long dispela pikinini."

Wanpela bilong ol dispela mama i bin gat 16 krismas long taim em i bel –em i brukim lo bilong Haiti. Dispela soldia i givim bel long em i go bek pinis long Uruguay. Pastaim em i bin

salim mani tasol nau em i stop na i no salim moa.

Narapela meri i bin gat bel bihain long wanpela man i reipim em.

Planti ol meri I no laik kamap long pablik long kotim ol dispela soldia bilong UN.

UN i bin tokaut las wok olsem bai ol pis kiping wok bilong en long Haiti i pinis long mun Desembra. Ol i bin stat inap 13 yia olgeta. Nau bai wanpela liklik plis fos i kisim ples.

Inait long dispela 13 yia ol dispela soldia i bin kamapim planti hevi. Las Desembra, UN i tokaut olsem i tru ol dispela pis kiping fos i bin givim sik kolera long Haiti. Dispela sik kolera i bin kilim moa long 10,000 pipel bilong Haiti.

Las wok narapela ripot i kamap gen we i tok 134 soldia bilong Sri Lankan i mekem pasin nogut wantaim 9-pela pikinini namel long 2004 na 2007. Ripot i tok UN i salim ol 114 pis kipa i go bek long kantri bilong ol tasol i no gat wanpela bilong ol i kalabus.

Macron na Le Pen resis long kamap presiden bilong Frans

FA-RAIT populis Marine Le Pen na sentris Emmanuel Macron i winim namba wan raun resis long ileksen bilong kamap Presiden bilong Frans.

Ol tupela i winim 9-pela arapela kendiet na bai ol i bung gen long namba tu na fainal raun long Me 7.

Macron i selebretim win bilong em na em i tokim ol sapota bilong em long Paris olsem ol i mas wok bung wantaim na em i tok tu olsem em i sapotim Yuropion Yunion (EU).

"Dispela strongpela tingting, dispela tingting insait long bel i save strongim ol pipel bilong yumi na holim strong kantri bilong yumi, pasin bilong bung wantaim na i no ken bruk nabaut, dispela bilip i winim resis nau long nait," em i tokim bikpela lain sapota bilong em husat i karim ol plak bilong Frans.

"Dispela ileksen i opim dua bilong bilip gen, long nupela rot i gat hop bilong Yurop na bilong wol tu."

Em i toktok long ol samting Le Pen i laik kamapim long Frans, wanpela bilong ol em long askim ol pipel bilong Frans long holim referendum "Frexit" – na vot long lusim E.U. o nogat.

Planti pipel i bilip Macron bai winim namba tu raun bi-long ol vot. Em i gat 39 krismas na i bin wanpela gavman minista bipo tasol nau em i namba wan taim bilong em long resis long winim wanpela opis.

Le pen, husat i stap long namba tu ples i tok em i wanpela ona long win na em



Independen kendiet Macron i winim 23.7 pesen bilong ol vot na lida bilong National Front, Le Pen i winim 21.7 pesen.

i amamas long ol pipel i givim em dispela luksave.

Em i tok gutpela sindaun bilong Frans i hangamap long namba tu raun bilong ol vot. Em i paia tu long Presiden Francois Hollande bilong Frans na Yuropian Yunion.

Ol ripot i tok long taim Le Pen i winim namba tu ples, planti protes i bin kamap long ol striit bilong Paris.

Le Pen em i wanpela lida husat i egensim ol refuji na ol Muslim na em i laik Frans i mas bruk lusim Yuropian Yunion na stap em yet.

Dispela i namba wan taim ol biknem politikal pati long Frans i no bin winim inap vot long go long namba tu raun vot.

François Fillon, wanpela konseketiv kendiet husat i kisim namba tri ples i tok, "I no gat moa toktok, tasol yumi mas vot egensim ol ekstrim rait. Olsem na bai mi vot long Emmanuel Macron."

Presiden Trump i tok long dispela wok olsem em i bilip Le Pen i "sanap strong long wanem samting i wok long kamap long Frans," na olpela Presiden Barack Obama i ring na tok gut lak long Macron.

Trump na Obama i no tokaut ol i sapotim husat tru long dispela resis.

OI 25 eksekutiv oda bilong Trump long 100 de em ol bilas tasol

LONG taim Donald Trump i kamap Presiden bilong USA long 20 Janueri, em i sainim planti ol eksekutiv oda – bilong ol promis em i bin mekem long taim bilong kempen long rausim ol wok em Obama i bin mekem na long strongim ikonomi na stopim ol ausait lain i go insait long USA.

Long opis bilong em inap long ples we em i sanap long toktok long ol sapota bilong em, Trump i wok long tok ol dispela eksekutiv oda em ol "bikpela samting tru" na i "impoten tru." Long taim em i sainim ol dispela oda, ol opisa bilong em long White House i save tok em ol bikpela "win" na ol promis em i bin mekem long ol sapota bilong em.

Tasol ol lain husat i glasim ol dispela eksekutiv oda bi-

long Trump insait long 100 de em i holim wok bilong presiden i tok ol dispela oda em 25 eksekeiv oda, 24 memorandum, na 20 proklemesen. Na ol i tok ol dispela oda em i bilas tasol na i no gat gutpela tingting i bihainim ol dispela oda.

Planti ol dispela eksen i laik kamapim bikpela samting, tasol i no gat lo bilong sapotim ol. Trump i givim oda long glasim wok bilong ol gavman ejensi, na i askim long ol rekomenedesen o i traime lo i stap pinis.

"Planti bilong ol dispela oda em i olsem so tasol," Cristina Rodríguez, wanpela lo profesa bilong Yale University husat i save long konstitusen na edministretiv lo i tok.

"Ol dispela oda i no gat as bilong ol nau. Planti bilong ol

wet long rekomenedesen bilong ol ejensi na sapos opis bilong presiden bai bihainim ol dispela rekomenedesen o nogat," em i tok. "Plani taim ol dispela rivi i save kamapim planti pepa wok tasol."

Namba wan samting Trump i bin mekem em long rausim Obamacare. Em i singautim ol nius lain i kam na ol TV kamera i kisim piksa bilong em i sainim oda long rausim dispela lo bilong heltke. Tasol i kam inap nau, gavman bilong em i no inap long kamapim nupela lo bilong kisim ples bilong Obamacare. Planti ol memba bilong pati bilong em tu i no sapotim dispela pasin em i mekem.

"Dispela presiden i no kamapim wanpela nupela lo em inap promotim nau," Mark Rozell, din bilong

Schar skul ov polisi na gavman long George Mason University i tok.

"Olsem na em i wok long kamap long televisen na nius long traime soim olsem em i kamapim tru samting long ol dispela eksekutiv oda bilong em."

I kam inap nau, Trump i sainim moa eksekutiv oda long namba wan 100 de em i holim wok bilong presiden. Em i winim ol arapela presiden bipo.

Sapos em i wok long sainim yet moa oda, bai em i sainim 96 eksekutiv oda long pinis bilong dispela yia. Em i winim George Washington, husat i sainim 8-pela tasol na Franklin D Roosevelt, husat i bin sainim 3,721 oda long taim em i bin presiden tupela taim.

Ol saveman i tok namba tasol i no inap soim trupela kala bilong pawa bilong

presiden. "Yumi no inap kaunim namba bilong eksekutiv oda tasol," Ken Mayer, wanpela politikal sains profesa bilong University ov Wisconsin-Madison i tok.

Mayer i wanbel wantaim ol arapela save lain husat i tok Trump i save laik soim olsem em i kamapim wok long tru tasol planti taim em i no gat as tru bilong ol dispela samting em i mekem.

"Dispela em i wanpela presiden husat i laik yusim pawa bilong opis bilong em long strongim ol ajenda bi-long em," Mayer i tok.

"Tasol em i wok long painim aut nau olsem ol arapela presiden bipo long em, i gat rot bilong sekap na balensim gut ol dispela ajenda bilong em."

STORI BILONG TUMBUNA

Moran daunim pukpuk

Longtaim bipo tru wara Flai i stap namel long Ol-sobip na Telifomin na long dispela hap i gat wanelala bikpela raunwara i stap. Long pasis bilong dispela raunwara wanpela pukpuk meri i lukautim kiau bilong em i stap.

Na man bilong dispela pukpuk meri i go painim kaikai na em i bin kilim wanpela wel pik. Na em i bin kaikai hap na em i katim hap na em i karim i kam long pukpuk meri bilong em. Na wanpela bikpela moran tu em i save stap long dispela raunwara. Moran tu em i wok long painim kaikai, tasol i no gat tru. Olsem na klostu i tulait nau na em i kam bek long ples we em i save i stap long en.

Na pukpuk man ya, em i kam givim kaikai long meri bilong em na em i laik i go daun long dispela raunwara. Moran ya het bilong en i go daun long wara pinis tasol

bodi bilong en i stap long wesan.

Dispela rot tasol pukpuk i save i go i kam. Olsem na pukpuk ya em i laik bihainim rot bilong en na em i laik i go daun nau.

Man, moran ya i stap pinis. Olsem na moran i holim pukpuk na tupela i taitim bun, tasol moran


i winim pukpuk na kilim em pinis. Na em i dringim wara na em i daunim pukpuk na em i laik i go daun long wara. Tasol em i no inap olsem na em i stap long ples we em i daunim pukpuk long em.

Olsem na tripela man long hap bilong Telifomin ol i bihainim wara Flai i kam daun

na ol i painim dispela moran na ol i kilim em na ol i larim em i dai na sting long dispela ples.

Na tripela man ya i go bek long ples. Em tasol liklik stori bilong mi.

Karolus K. Ayam
S.H.P

**PAINIM WOD PILAI**



Oi wod lista:

ABUSIM
FUTBAL
GLASIM
PUSI
RON

WANTU	TULTUL	YELO
PAIT	PLEIM	MARBEL
LALAI	WANPISIN	BRINGIM
GRISIM	DRAIBISKET	INAP
HAPAP	GRISMAN	KANGAL
RAUNABAUT	TATANGU	PORIS
BROSIM	WANWIN	RAUNIM

0 Q J Y D S E Z D L Z J I I Z E E Q L G S H C R H
M O B C F O A W S P I H N E D O F X S X Z O C S G
L L H P U U F S C B I N O G S I D H C A L I V B O
R E I S T I N S G A W Q O H A J F C R E U T P F H
I A N S B E P M L J A E S O N O T M E J O H G P D
A L A S A D I A A U N Y G H A I N A K Y A A Y R H
K C I B L S L U S H H W N R T T D P O L Y E B A E D
P F T D O P O R I S I X I O P U I N F T S G G N I
B X A R A U N I M S N T S H W L E R W E L E E K A
B W B A A E B R I N G I M A R B E L V E T K N J E
I M U I D U S P T I G E A P K E P I F P N G G L V
H E S B R O N E A M T M N A G T S F M X S H Z M V
X K I I D A P A C C I D T P Z J N E T L F L R E G
Z P M S W P N X B S P T E Q B X I U F C E E K G S
T O B K T X C G I A I U I O O U E C N C P S S N C
Z P T E A O M R R A U L S T W E A I F S J I N W M
L T A T A N G U P T B T D I P H P U X N E T N E O
S D E A N H G I N A P U E B S K J J Q F S N J L E
C I U K O H E A N Y E L O O G U L A J G S E T T G
E E W O L E W R L H E P R L N H A N E S D U O S D

Em nau! Ol pikinini
i ken painim rot
i go long ples wantaim
Wantok lain...



Ansa bilong Wod Pilai isu 2222

R U P Y E L X O M S A E D T S P P R R T J X P R
V C N Q S K A Y V G O H W O K F O A R I B O S A B
T I E S D N Y G L E D T I S O K O N L V N Y Z H C
Z E G A L T R O Q C N L S P R A N A U S H N I P L
V T S N R T Z F P L S O E M A N K T A M K D A N Z
N S S E A E H D Y A Z D W B U A F P T S K I G O X
N J E D G W O E L I I T I A N T A F U Z L E H E R
Y I Q P J G F I I P T E D N E P P E M K O S O M S
P R T E H P A I O A Q M O A M A F D H R X N T R H
A D S B O E M T M N A P K N M O I P S N O S Z S O
T D G E E G S A R K O E T A Q S H W M H P R D Q E
I O I E D G M Z I E D L K T A E D M T N T G O F S
A A R F E X Q W R K S A A E E O E D D H I H S E Q
E F B R S G E E I B R T K C E C J C S J R T A E A
O G E A G V O E D O O M S Q S T W Q S H S E F G R
G I O Z H M T P R T E B K Y A G R T G T C N D F N
E L U N T F P D S C E R T T N U U R D M W C Q E
T O E T M Z R I X E G A U N T O E V K N L F D O C
M C Y Y Z W R P V A O A S D T N E L M O E T I A C
Q H R S M N O P Y R L T T E X S I S L Y E L B L N



TOK PISIN NEWS

from Radio Australia

radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service

6am - 7am 6080; 7240(KHZ)

7pm - 9pm 5995; 6020; 9710; 1280(KHZ)

Ol saintis i was yet long Manam volkeno

OL volkenolojis i wok long was long volkeno long Manam Ailan long Madang Provins, bihain long em i bin stat long pairap long Ista wiken.

Tasol Asisten Dairekta long PNG Volkeno Obsevator long Rabaul, Is Nu Briten Provins, Ima Itikarai i tok ekktiviti long Manam Volkeno i bin go daun pinis.

Mista Itikarai i tok taim volkeno i wok long pairap long Ista wiken, ol i bin apim alert level i go antap long 3 na nau ol i putim i go daun gen long level 2.

Taim Manam Volkeno i

bin pairap bikpela long yia 2004, ol 5-pela pipel i bin dai na ol i bin autim moa long

9,000 pipel bilong Manam Ailan na putim ol long bikples Bogia.



Maunten paia i bin pairap long Rabaul i wankain olsem Manam Ailan volkeno.

PNG wari yet long kopi beri bora

Caroline Tiriman i raitim

DISPELA binatang, kopi beri bora i bagarapim sampela kopi fam long tupela provins long Hailans rijon.

Coffee Industry Corporation (CIC), i tok em i wok long mekim wok long helpim ol kopi fama husat i bungim hevi long binatang ol i kolum kopi beri bora.

Ol i bin painim dispela binatang long Jiwaka na Isten Hailans provins tupela mun i go pinis.

Kopi industri i save bringim samting olsem 280 milien dola i go long ikonomi bilong kantri long wan wan yia, tasol sapos ol i no stopim kwik dispela sik, bai em inap long bagarapim in-



Ol kopi bin long wanpela han bilong diwai kopi.

dastri, na tu kamapim hevi long ol liklik kopi fama.

Planti pipel i save planim kopi long wanem em i wanpela samting em ol i save lukim mani long en.

Nesenel gavman i bin promis long givim K20 milien Kina long helpim wok

bilong rausim dispela sik, tasol ol pipel i wet yet.

Dr Nelson Simbiken, husat i wok olsem wanpela entopologis long Coffee Industry Corporation i tokim Radio Australia olsem maski mani i

sot ol bai go het na helpim ol fama long daunim dispela sik.

Knight i laik UNHCR i mas lukautim ol refuji na asailum sika

Caroline Tiriman i raitim

MEMBA bilong Manus Open Ronny Knight i tok ol gavman bilong PNG na Australia i mas givim wok bilong lukautim ol refuji na asailum sika long Manus ditensen senta i go long United Nations High Commissioner for Refugees (UNHCR).

Ronny Knight i mekim

dispela toktok bihain long ol pait na trabel i bin kamap long Gut Fraide namel long ol PNG soldia na ol asailum sika bihain long kros i kamap long husat i ken yusim wanpela soka fil.

Ol ripot i tok olsem sampela asailum sika i bin pilai long soka fil taim ol pikinini bilong ol nevi opisa i bin laik go pilai tu long dispela soka

fil, tasol ol asailum sika i bin kros na paitim wanpela nevi opisa husat i bin go long stretim dispela hevi.

Mista Knight i tok tu olsem ol i bin save olsem dispela kain hevi bai kamap, bihain long ol i bin surikim ol asailum sika i go long Lombrum Naval Bes we ol i save bihainim laik bilong ol na kamapim wari long komuniti.

Capital FM bai maus bilong Vanuatu Mini Gems

Sam Seke i raitim

PASIFIK Mini Gems Ogenaising Komiti long Vanuatu i makim Capital FM 107 long Port Vila olsem maus bilong 2017 Pasifik Mini Gems em Vanuatu bai lukautim long mun Desemba.

Sport ripota bilong FM 107, Harry Atisson i tok olsem olgeta pipel long Pasifik na long wol bai i harim olgeta ripot bilong ol gems "live" long redio na long internet.

Em i tok bai i gat ol apdet na risal bilong olgeta spot ol i

pilai long dispela Mini Gems.

Mi askim em long stori long raun 2 bilong Port Vila Digicel Premier League 2017.

Ifira Black Bird we Kosa Batram Suri na planti pilaia bilong en i bilong Solomon Ailan nau i go pas long dispela kompetisen.

Pacer-Plus bai go het nau



Toktok i no laik egensim Pacer-Plus tred agrimen namel long ol Pasifik kantri wantaim Australia na Nu Silan.

Caroline Tiriman i raitim

AUSTRALIA na Nu Silan i pinisim ol toktok nau bilong kamapim Pacer-Plus tred wantaim klostu olgeta Pasifik Ailan kantri, tasol Fiji na Papua Niugini i no stap long dispela agrimen.

Ol Pasifik kantri i bin lusim eitpela yia olgeta long toktok wantaim Australia na Nu

Silan long kamapim dispela tred agrimen.

Planti lida long rijon i bin mekim ol toktok egensim Pacer-Plus long wanem ol i tok em bai helpim tasol Australia na Nu Silan na ol pipel bilong Pasifik bai no inap kisim wanpela gutpela benefit long en.

Ol dispela kantri i bin pinisim ol dispela toktok long

wanpela miting bilong ol long Brisbane long dispela wik.

Pala Molisa, husat i wanpela man bilong Vanuatu na leksera long Victoria University of Wellington School bilong Accounting na Commercial Law long Nu Silan i tokim Radio Australia olsem em i luksave long tingting bilong Fiji na PNG long no ken stap long dispela agrimen.


Indonesia i larim Pres Fridom long Wes Papua

Caroline Tiriman i raitim

OL niusman na meri bilong ol narapela kantri i ken go insait long Wes Papua na kisim nius long wanem Pres Fridom em i stap insait long mama lo bilong Indonesia.

Franzalbert Joku, i bin bikpela long PNG, tasol em i bin go bek long Wes Papua tenpela yia i go pinis na em i tok em i no lukim Indonesia i save stopim pres fridom long Wes Papua.

Mista Joku husat i wok nau wantaim Indonesian gavman i tok ol stori em planti pipel i save mekim olsem Indonesia i save stopim ol jenelis long go long Wes Papua i no stret.



Franzalbert Joku.

Manus provins i no orait tumas bihain long pait

Sam Seke i raitim

PROVINSAL Polis Komanda long Manus Senia Inspekte David Yapu i tok, ples i stap isi tasol i gat sampela belhevi i stap yet bihain long pait i kamap namel long ol soldia bilong Difens Fos na ol lain asailum sika long Gut Fraide.

Em i tok ol soldia long Lombrum Naval Bes i bin go pairap long Imigresen Ditensen Senta we wanpela senia PNG Imigresen Opisa, wanpela polisman na sampela asailam sika i kisim bagarap. I bin gat ol bagarap.

i bin kamap tu long propeti.

PPC Yapu i tok ol polis na ol Difens Fos yet i wokim



Kates bilong gan i kamapim bagarap long Manus Asailum deitensen senta.

Tripela SP Bruweri opisa pinis trening long ovasis

SP Brewery Ltd (SPB) i ammas long em i wanpela long ol nesenel kampani we i sapotim moa trening long ol opisa bilong ol.

Ol tripela opisa bilong SPB Saplai Sein i kam bek long kantri bihain long ol i go tren long Vietnam wantaim tingting bilong serim save bilong ol long wok bilong bruweri.

Marcia Pokapin (pekesing supavaisa), Vivienne Baloilo (Bruwing supavaisa) na Josephine Efi (Maikrobaiolos) i go long Vietnam.

Maski ol i gat hevi long tok ples Vietnam tripela lain i tok 6-pela mun trening i bin gutpela na ol amamas.

Ol i tok ol i lainim planti samting na planti bilong ol samting i wankain long wok ol i mekim long kantri.

Bikpela samting ol i lainim em Proses Teknoloji we em i samting tripela wantaim i mas lainim long en.

"Bikos mi nupela long brewing, mi mas kisim tren long olgeta hap bilong brewing long stat i go inap long pinis bilong em," Pokapin i tok.

"Mi lainim na save long wei bilong kontrolim proses long wan wan hap bilong mekim bia.

"Tingting bilong ol long wok we ol i soim faivpela Heineken pasin bilong wok long sait bilong baim na salim samting. Ol i pas tru long wok bilong ol osem ol



SPB's Pekesing Supavaisa, Marcia Pokapin, i sekim ol samting long bruweri faktori long Ho Chi Minh siti, Vietnam.

Poto: SP Brewery

i no ken mekim asua long wanpela hap bilong wok bilong ol.

"Pasin bilong konsentrat, ekuret na spit long kamapim wok long taim i bikpela tingting bilong ol.

Pokapin i stap na wok long Pot Mosbi.

Bihain long trening, em i tok i gat inap save na i bilip long wanem samting em inap long mekim.

"Mi laik long helpim long kontrolim ol proses, kwaliti na rausim ol hap we i nogut long em.

Tripela meri i yusim namba wan mun long trening, lainim proses kontrol long Heineken Vietnam Bruweri long Ho Chi Minh siti.

Bihain long dispela tripela meri i go long narapela, narapela hap bilong kantri na siti Pokapin i go long Hanoi, Mis Baloilo i go long Tailand na Mis Efi i go Ing Indonesia.

Tripela meri i amamas na tok tenkyu long SP Brewery long givim ol sans long go ausait long kantri long luksave na kisim trening long wei bilong mekim wok.

Total redi long mekim Papua LNG disisen



Antelope ges long Galp provins.

TOTAL, Frans wel na ges kampani we i laik divelopim Papua LNG long Galp provins, i tok kampani i plen long mekim ol wok osem haus na paiplain long narapela yia.

Patrick Pouyanne, kampani siaman i tok kain wok bai kamap bihain long em i mekim las wok glasim long stap bilong ges (risev) long dispela hap.

"Mipela bai mekim las wok glasim long stap bilong ges na bai save i gat inap ges long mipela i ken kamap wantaim disisen bilong di-

velopim projek," em i tok.

"Bihain long dispela mipela bai statim ol enjiniaring stadi. Mipela i hop long mekim dispela stadi long pinis bilong dispela yia.

"Long nau mipela i lukim i gat inap ges na osem mipela i plen long mekim ol enjiniaring disain long dispela yia na narapela yia bai ken save long bikpela bilong projek."

Pouyanne i tok kampani i plen tu long mekim investmen disisen long pinis bilong dispela yia.

Long said bilong ol hevi nau

i stap long kantri osem mani, ol disisen provinsal na nesenel gavman bai mekim, em i tok ol i stap isi na lukluk long wanem samting bai kamap bihain long 2017 ileksen.

"Taim mipela invest long LNG plen, mipela bai invest long 20 yia. Namel long dispela 20 yia mipela bai save long ol prais (ges) sapos em i stap antap o no gat.

"Mipela i laik ol gutpela prais tasol bikpela samting mipela i laik lukim em long save we mipela bai salim ges bilong mipela," em i tok.

Gavman, Ok Tedi papagraun sainim tok orait

OL papagraun bilong Ok Tedi main na ol manmeri long Westen provins nau bai kisim 33 pesen win mani long main bihain long ol i sainim tok orait wantaim gavman long dispela wik.

Praim Minista Peter O'Neill i tok dispela tok orait i gat bikpela tok long em long wanem dispela bai lukim ol papapgraun bai kisim gutpela win mani long projek we i stap long graun bilong ol.

Em i tok senis long baim ol papapgraun em Ok Tedi Mainining Limited (OTML) bai givim mani stret long wan wan tras kampani bilong ol. I no osem bipo we mani i go long Westen Provinsal Gavman na bihain givim long ol papapgraun bihainim tok save bilong Treseri Dipatmen.

Tasol O'Neill i tok wantaim dispela senis, ol papapgraun nau i ken kisim gutpela helpim long sait bilong win mani.

Em i tok dispela rot bilong mekim ol peimen bai bihainim Tras Did (Deed) rot we i tokaut long wanem wok gavman i mas mekim long baim ol papapgraun.

Wantaim dispela agrimen gavman i givim tok orait tu long sainim bilong Ekwiti Benefit Sering (EBS) Agrimen we i bihainim ol toktok i kamap long Alotau long



Praim Minista Peter O'Neill i sekan wantaim Richard Zumoi, mausman bilong ol papapgraun long taim bilong sainim tok orait. Poto: OTML midia

Janueri dispela yia.

EBS i soim kain rot we win mani i mas go long ol papapgraun na we ol helpim i mas

stap longpela taim (long tem) na dispela bai kamap ol wok olem bilong kamapim o stretim rot, haus, wara, komyunikesen, helt na edukesen.

Dispela ol tok orait i kamap bihainim ol toktok i kamap namel long Westem provins na Nesenel Gavman we ol i bin stat mekim dispela ol toktok long 2014.

Las hap em givim bilong ol sea setifiket i go long MRDT2, MRSRM na Minerel Risoses CMCA Holdings Limited.

Displea ol tripela Minerel Risoses Developmen Kampani (MRDC) han kampani bai holim ol sea.

Kampani menesing dai-rekta Augustine Mano i tok ol i amamas long go pas long mekim ol toktok we nau i lukim MoA na HoA i kamap tru we praim minista wantaim minista bilong Mainining, Byron Chan i stap na lukim.

Long lukim dispela tok orait tu em 38 maus man bilong ol grup long Ok Tedi Main na ol ples long Westen provins .

Ol papapgraun i amamas long ol tok orait na ol i tok tenkyu long Nesenel Gavman long luksave bilong ol.

Nupela Monier Konstraksen plent ... i laikim kwaliti prodak

MONIER, kampani we i save mekim ol hadwea samting olsem tang, paip na metal samting i laik promotim wok bilong kamapim kwaliti prodak.

Presiden bilong kampani Sir Kostas Constantion i tok sapos ol i no mekim ol kwaliti prodak, bai hatwok na mani i lus na ol prodak i no inap stap longpela taim.

Em i mekim dispela tok long taim kampani i bin opim nupela faktori bilong wokim ol samting long Nebiri na Rouna Kwaris long 9-Mail ausait long Pot Mosbi i no long taim i go pinis.

Dispela faktori kampani i mekim long mani mak bilong K45 milien.

Wantaim ol hadwea samting kampani i save brukim ol ston bilong putim long rot na mekim ol konkrit o simen na ain bilong wokim haus.

Sir Kostas i tok bikpela samting kampani i amamas em long em i gat faktori bilong em yet long mekim disisen na mekim ol samting.

Plantol kastoma bilong kampani em ol praivet kampani tasol em i save givim saplai long Nesenel Woks Dipatmen, Nesenel Kapital Distrik Komisen na narapela ol gavman ejensi.

Ol rot long Pot Mosbi na Sentral provins em ol wok Monier i save wokim.

Kampani i save salim tu ol non-presibel prodak olsem paip, pre-cast na beg kuari (ston) long ol arapela rijon long kantri olsem Niugini Ailans na Hailans.

Kampani i save kisim planti wokmanmeri tasol bikos long hevi bilong mani em i daunim namba bilong ol wokman long 3000 i go daun long 2600.

Long opim nupela faktori Praim Minista Peter O'Neill i tok tenkyu long kampani long wok em i mekim.

"Tenkyu Constantino Grup long helpim bilong yu bikos wantaim dispela, 2000 i go long 3000 famili i ken gat kaikai long tebol," em i tok.

"Mipela luksave long yu

bikos yu stap wantaim mipela moa long 60 yia.'

Sir Kostas i amamas long O'Neill na i tok kampani bai mekim olgeta samting long helpim long developim kantri long wok bilong em.

Long dispela em i tok kampani bai kamapim ol wok we bai mas stap longpela taim.

"Sapos wanpela disaina i mekim rot bilong stap 20 i go long 25 yia na sapos wok i no gutpela, dispela i ken daunim namba bilong yia i kamdaun long 10-pela yia," em i tok.

"Mipela i laik lukim olsem wok mipela i kamapim long hamas yia em bai stap, mipela i laik lukim tru olsem dispela wok i ken stap na inapim namba bilong yia mipela i mekim samting long em.'

Monier i PNG kampani na i bin stat long 1958.

Long planti ol yia Steamships i save stap papabili bilong kampani inap long Sir Theo Constantinou i baim long 2005.

INVESTMENT TOKTOK wantaim DR. STEPHEN NASH

Lusim tingting long birua long bagarap taim


Insait long dispela toktok mipela i tokaut long hevi long pepa na sampela long trupela samting i kamap long soim olsem we bilong banisim birua em i bikpela samting long menesmen bilong ol portfolio

Toktok long Pepa

Lukluk long toktok long pepa tasol, givim aut ol portfolio em i long tupela samting; mani i kam insait na long birua. Bikpela lukluk i save stap long mani kam insait, tasol long dispela toktok mipela laik tok lukaut long dispela kain toktok, na mipela laik tokse olsem ol investa i laik lukluk long ol ris o birua na mani kam insait wantaim. Lukluk moa long strongim wei bilong givim auto i asset, olsem Piksa 1 daunbilo i soim, we i gat mak bilong ikwiti alokesen i antap tru; klostu 80 pesen wantaim wanpela liklik alokesen tru i go long non-ikwiti, long mak bilong 20 pesen.

Asset allocation: aggressive

Source: NSL



Piksa 1

Dispela kain strongpela wei bilong brukim ikwiti bai lukluk long pepa olsem, em i kamap gut tru sampela taim na sampela taim i no kamap gut, olsem na volatility bilong ol mani i kam insait i mas stap antap , long ol i ken makim strongpela alokesen, taim yu skelim wantaim mak bilong wanpela portfolio alokesen we i no strong tumas.


Wei bilong mekim

Long Piksa 2 daunbilo, tupela alokesen em 'traim tasol', we wanpela trupela aplikesen bilong toktok bilong pepa antap i kamap. Long hia em ol i yusim wanpela trupela data bilong mun, we strongpela alokesen ol i skelim wantaim wanpela isi alokesen, we isi alokesen em strong bilong em i wankain , tasol long isi alokesen 31 pesen bilong alokesen i no gat long PNG ikwiti, na i gat 31 pesen alokesen i stap long ol PNG bond. Luksave olsem, wantaim wanpela bikpela moa ikwiti alokesen, ol mak bilong mani kam insait i antap moa long 2007 na long 2008, tasol strongpela alokesen i no mekim gut long pinis bilong yia 2008 na long 2009. Tok tru em olsem, wanem samting we strongpela alokesen i kamapim, long skelim mak wantaim olpela alokesen, long 2007 na 2008, em i givim bek 2008 na 2009. Na tu, strongpela alokesen i karamapim wok kamap bilong olpela portfolio stat long 2011 i go long 2014.

Piksa 2

Wanpela bikpela hevi wantaim strongpela alokesen em olsem em i gat samting olsem 70 pesen moa volatility, taim yu skelim mak bilong me wanpela nara-pela olpela alokesen. Moa klia em 9.95 pesen em i namel mak bilong wanpela yia standet di-viesen bilong riten o mani kam insait long olpela o konseketiv alokesen, potfolio na 16.79 pesen bilong strongpela potfolio, namel long 2004 na 2016. Wantaim olgeta dispela narapela birua i stap, bai yu ting olsem mak bilong mani i kam insait bai gutpela moa, long strongpela potfolio, taim skelim mak wantaim olpela potfolio, tasol lukluk bilong dispela em ol i no save mekim tru. Tok tru olsem, sampela moa mani kam insait, long strongpela alokesen, em i liklik tru. Makim strel, 9.92 pesen em i namel bilong enuel riten o mani kam insait long wanpela yia bilong strongpela alokesen, na 9.72 pesen bilong olpela alokesen, namel long 2004 na 2016.

Long pasim toktok, dispela pepa i stat wantaim toktok bilong tingting olsem yumi mas tingting gut long birua, na mani kam insait wantaim, long taim bilong brukim ol asset long wanpela potfolio. Ol bai traim dispela tingting, long trupela wei, yusim trupela rekot o mak bilong mun. Em i luk olsem tingting bilong toktok long pepa, we ol i lukim olsem birua em i impoten olsem mani kam insait, taim ol i brukim ol asset long wanpela potfolio, i soim trupela piksa wantaim ol i soim long hia.



Long kamap Nambawan pren bilong yu na famili; halivim, strongim na lukautim moni gaden bilong yu nau na bihain.

BIGGER, BETTER, SAFER,
STRONGER AND STILL NUMBER 1

CEO: Kakao i kamap gut

MAKET ripot bilong kakao i soim karim bilong kakao i kamap gut na i stap long 40,508 tan, namel mak we em i bin stap long em bipo long sik bilong kakai, Kakao Pod Bora (CPB), i kamap, Sif Ekskyutiv Opisa bilong Kakao Bod, Boto Gaupu i tok.

Mista Boto Gaupu i tok las yia prodaksen bilong kakao i go antap long 20 pesen moa long em i karim long 2015.

Em i tok dispela i lukim mak bilong ekspot revenu (mani em i kisim long salim kakao) i go antap long 32 pesen.

Em i tok maket ripot bilong kakao long Desemba kwata, 2016 i soim prodaksen bilong kakao na ekspot i kamap long 40,508 tan mak. Dispela long taim CPB i stat kamap na bagarapim industri.

Em i tok kakao prodaksen na ekspot long 2015 i stap long 33,650 tan tasol bihain long dispela i gat gutpela senis long mak bilong 6858 tan.

Bikos long dispela senis, industri i kisim K306.4 milien long 2016, K88.3 milien moa long 2015 we em i kisim K272.1 milien.

"Dispela em bikos long gutpela weda (kamap bilong san na ren) long kantri wantaim ol program industri i ranim," Mista Gaupu i tok.

Indastri i ranim ol program olsem Distrik Kakao Nesi na Kakao Fret Sabidi bilong CBPNG. Dispela ol program em Nesenel Gavman i fandim aninit long sapot grant bilong developmen baset na ol i kamapim ol program long 2014.

Gaupu i tok as tingting bilong projek em bilong lukim i gat inap kakao sid na long lukim ol opisa i ken kamapim narapela kakao long wanpela kakao yet (cloning) maski i gat hevi bilong sik kakao (CPB).

Wantaim dispela em i tok projek i bilong strongim industri na long lukim ol rural fama inap



Kakao i wok long kamap gut na strongim industri. Poto: File

kamap long ol maket we oltaim ol i save painim hat long salim kakao bilong ol.

Arere long ol projek Gavman i fanim, i gat ol arapela helpim i kam long ol oganaisesen olsem dona ejensi, praviet sekta na developmen patna olsem PPAP bilong Wol Benk.

Dispela program i kamap long Is Nu Britan na Bogenvil na nau bai go long Momase rijon.

Gaupu i tok dispela ol projek i kamapim bikpela senis long industri na dispela i kamap ples klia long prodaksen na ekspot revenu industri i kisim.

"Ol projek i lukim gutpela mak na i helpim olgeta lain manmeri long industri, moa long ol kakao fama, distrik na provinsal ikonomi husat i save stap long strong bilong kakao," em i tok.

Em i tok gutpela mak bilong prodaksen i kamap bikos long wok na sapot industri i kisim long fama we ol i no bin kisim kain luk-save bipo.

Nahu-Rawa pipel krai yet long developmen

James G. Kila i raitim

TAIM ol arapela rurel distrik long Papua Niugini i wok long amamas long lukim senis na developmen i kamap long ples bilong ol, ol pipel bilong Nahu-Rawa LLG long Raikos distrik long Madang provins i stap long tudak yet.

Ol pipel i tokaut olsem ol i pilim gavman i no stap wantaim ol bikos planti yia nau ol lida i no bringim gavman sevis na helpim i go long dispela ples.

Dispela em bel wari na krai bilong planti manmeri na pikinini long Nahu-Rawa LLG we i stap long maunten bilong Finistia maunten long Raikos.

Tupela lokal man bilong Nahu-Rawa, Limba Aki na Iranda Awanda, i makim ol rurel pipel long autim bel wari bilong ol bikos longpela taim tru no gat gutpela rot, bris na gavman sevis long ples bilong ol.

Ol i tokaut olsem kopi em kes

krop we ol pipel save salim na kisim mani long helpim sindaun bilong ol. Tasol nau yet rot i bagarap tru, bris i bruk na ol kar bilong ol kopi baiya no save go olgeta antap long Tauta stesin na baim kopi.

Tupela i tok olsem ol viles fama save karim kopi na kalapim maunten na ol bikpela baret na brukim bus na wokabaut i go daun long Ranara misin stesin long Ramu veli na salim kopi bigong ol na save go bek.

"Sampela fama long eria bilong mipela save biahinim bus rot na wokabaut longwe rot tru go kamap long Ramu Suga na salim kopi long hap" Iranda i tok.

Tupela i tokaut tu olsem gavman stesin bilong ol long Tauta em bus i karamapimna planti ol publik sevan i lusim na go long arapela distrik o stap long Madang taun.

"Bipo long taim bilong provincial gavman taim memba olsem marasin na medikol helpim."

Markus Kavo i stap mipela save lukim meintenens long rot na bris na gavman sevis.

"Tasol insait long las 10 na 15 yia i kam ol Memba bilong Raikos mipela save makim ol no save bringim developmen na helpim mipela ol Nahu-Rawa pipel," Limba wantaim Iranda i tok.

Bris namel long Ranara na Tauta i bruk pundaun pinis taim bikpela Surinam wara i tait go daun na wilwilim ain na rausim bris na karim i go. Tude ol pipel i save wokabaut longpela rot tru long painim sevis na salim kopi bilong ol long kisim mani long baim ol liklik samting olsem sol, oil bilong kuk, rais, na ol samting olsem tos, bateri na ol klos bilong ol pikinini bilong ol.

Tupela i tokaut tu olsem ol helt wokman long Tauta gavman stesin i lusim ples na go pinis na ol pipel i kisim taim long painim marasin na medikol helpim."

2017 NRL Dro bilong raun namba 9

Det	Hom	Awe	Pilai Graun	TV	Taim
Fonde, Epril 27			Suncorp Stediam	Nine, Fox	7:50 pm
Fraide, Epril 28			Allianz Stediam	Fox	6:00 pm
Fraide, Epril 28			1300Smiles Stediam	Nine, Fox	7:50 pm
Sarere, Epril 29			CBus Super Stediam	Fox	3:00 pm
Sarere, Epril 29			ANZ Stediam	Fox	5:30 pm
Sarere, Epril 29			Leichhardt Oval	Fox	7:30 pm
Sande, Epril 30			Mt Smart Stediam	Fox	2:00 pm
Sande, Epril 30			WIN Stediam	Nine, Fox	4:00 pm

2017 NRL Risal bilong raun namba 8

Det	Hom	Awe	Pilai Graun	TV	Taim
Fraide, Epril 21			GIO Stediam	Fox	6:00 pm
Fraide, Epril 21			ANZ Stediam	Nine, Fox	7:50 pm
Sarere, Epril 22			ANZ Stediam	Fox	3:00 pm
Sarere, Epril 22			1300Smiles Stediam	Fox	3:50 pm
Sarere, Epril 15			Southern Cross Group Stediam	Fox	7:30 pm
Sarere, Epril 22			ANZ Stediam	Nine, Fox	4:00 pm
Tunde, Epril 25			Allianz Stediam	Nine, Fox	4:00 pm
Tunde, Epril 25			AAMI Pak	Fox	7:00 pm

2017 NRL Lata | TELSTRA PREMIASIP

Po-sisen	Tim	P	W	L	D	B	F	A	+/-	Pts
1		7	6	1	0	0	191	104	87	12
2		7	6	1	0	0	134	85	49	12
3		8	5	3	0	0	160	102	58	10
4		8	5	3	0	0	159	129	30	10
5		7	5	2	0	0	138	116	22	10
6		8	5	3	0	0	163	164	-1	10
7		8	4	4	0	0	200	143	57	8
8		8	4	4	0	0	170	161	9	8
9		8	4	4	0	0	122	134	-12	8
10		8	4	4	0	0	146	160	-14	8
11		7	3	4	0	0	118	150	-32	6
12		8	3	5	0	0	146	179	-33	6
13		8	3	5	0	0	128	204	-76	6
14		8	2	6	0	0	138	153	-15	4
15		8	2	6	0	0	172	218	-46	4
16		8	1	7	0	0	122	205	-83	2

Meninga i makim Kangaroo skwat

KOSA bilong Australia Kangaroo, Mal Meninga, i makim ol skwat bilong ol Kangaroo long pilai egensis ol Nu Silan long mid-yia traim pilai bai kamap long namel bilong mun i kam.

Mal Meninga i gat strong-pela bilip olsem top namba 7 pilaia bilong ol Cowboys na Kangaroo, Jonathan Thurston, bai pilai egensis ol Parramatta Eels long Fraide bipo long ol bai go insait long kemp bilong ol Kangaroo.

"Mipela i gat bikpela ama-

Jonathan Thurston i laik salim bal i go long poro pilaia taim ol Kangaroo i bin pilai egensis ol Inglan long Foa Nesens resis.

mas long Jonathan i laik pilai," Meninga i tokaut long las wik Sande.

"Mi save olsem em i stap long gutpela lukaut bilong ol Dokta bilong ol Cowboys na

em bai pilai long Fraide na mipela bai lukluk long em long dispela taim.



O'Neil i kisim strong bek



Senta pilaia bilong ol Cowboys i apim han long sekhan wantaim poro pilaia bilong em.

SENTA pilaia bilong ol North Queensland Cowboys, Justin O'Neil i amamas long em i pilai gut bihain long em i no bin pilai tupela gem.

O'Neil i soim kala bilong em gut na kisim moa strong taim em i pilai long raun namba 8 resis egensis ol Newcastle Knights bihain long em i bin

kisim bagarap na i stap aut long tupela wik.

O'Neil i tok olsem ol Cowboys i no inap long lus long raun namba 7 sapos em i pilai long dispela taim. Ol Cowboys i daunim ol Knights, 24-12, taim O'Neil i joinim ol Cowboys long raun namba 8 resis i kamap long las wik Sarere.

Fury bai no inap pait

HUGHIE Fury bai no inap pait long wol hevi weit taitel egensis Joseph Parker bihain long em i kisim bagarap.

Fury i kasen bilong bipo bipo wol hevi weit sempion, Tyson Fury, i ken pait egensis WBO sempion, Parker, long Oklan, Nu Silan, long Me 6, long namba wan wol taitel

pait bilong em.

Tasol, em bai no inap pait bikos em i no orait yet long em i bin kisim bagarap na em bai malolo long 3-pela o 4-pela wik.

Promota bilong Parker, Duco Events, i tok olsem ol i stat wok long painim wanpela long kisim ples bilong em.



Hughie Fury, wantaim kasen bilong em, Tyson. Fury bai no inap pait egensis Parker long Me 6.

Burgess bai no inap pilai 5-pela gem



George Burgess bilong ol South Sydney Rabbitohs.

FOWAD pilai bilong ol South Sydney Rabbitohs, George Burgess, bai no inap pilai 5-pela NRL gem bihain long em i bin givim solda sas long wanpela birua pilaia.

Burgess i bin givim wanpela gret-tu solda sas long Anthony Milford bilong ol Brisbane long 63 minit bilong Fraide nait resis. Ol Brincos i

daunim ol Rabbitohs wantaim wanpela poin, 25-24.

Lo bilong NRL i laikim Burgess long stap aut inap long 4-pela gem, tasol em i kot na i lus, em bai no inap pilai 5-pela gem.

Burgess bai no inap pilai traum pilai bilong ol Inglan egensis ol Samoa long Me 6 long Campbelltown.

Barcelona i daunim ol Madrid

LIONEL Messi i skoaim wanpela gol long las minit i skruim skoa bilong ol Barcelona, 3-2, egensis ol Real Madrid em namba 500 skoa bilong em.

Messi i kisim tupela gol



long i bringim ol Barcelona i go antap long top bilong El Clasico Laliga taitel salens.

Tupela gol bilong em i setim namba 16 rekot long El Clasico Laliga.



GLASIM RAMUNICO PROJEK

Wampela Ramu Nico, Wampela Komuniti

MCC



Xu Changyu i raun baim kabis long Madang taun maket.



Redi long baim popo long wampela mama.



Xu baim brokoli long wampela man long Madang taun maket.

Ramu NiCo (MCC)

Mes Sapotim Madang Ikonomi

MESS o haus kaikai bilong Madang Operesen Bes bilong Ramu NiCo Menesmen (MCC) long Madang taun i kamap olsem wampela gut-pela kastoma bilong ol lokal maket lain long Madang taun.

Dispela em bikos olgeta de stat long Mande i go Fraide, dispela mes o ples kaikai bilong Ramu NiCo save go na baim ol fres kaikai long maket na helpim long givim mani long ol pipel.

Narapela samting tu em mes bilong Ramu NiCo i save baim ol stua kaikai long ol stua long taun long sapotim ikonomi bilong Madang.

Hed Sef bilong Ramu NiCo mess long Madang Bes em Xu Changyu. Dispela man em i kamap olsem bikpela pes pinis insait long Madang taun maket, na planti lain save lukim em na save kolim nem bilong em 'David'. Dispela em bikos olgeta moning Xu save raun na planti ol kaikai na kumu, kabis, kerot na ol arapela kumu long Madang taun maket.

Xu em bikpela pes tu long ol groseri stua long Madang olsem MST Supamaket, Papingo, City Pharmacy na Andersons.

Taim Ramu NiCo i kirapim Madang Operesen Bes bilong en long Madang taun na putim kamap mes bilong ol wokman bilong en long hap, em i save baim ol fres kaikai na kumu long ol



Xu baim tomato.

maket lain na givim mani long sapotim lokal ikonomi.

Xu i tok olsem dispela mes o kitsen bilong Ramu NiCo long olgeta wik i save baim ol fres gaden kaikai na kumu na ol abus na samting long stua wantaim mani mak olsem K5000 o K6000 long olgeta wik.

Long taim ol spesel de i kamap long Madang Bes olsem Chinese Nu Yia em save lukim mani mak save antap.

Long tupela Projek eria bilong Ramu NiCo (MCC) long Kurumbukari Main na na komyuniti bilong ol.

Basamuk Rifaineri em mes i stap aninit long NCS-Raibus. Dispela ketering kampani save kukim kaikai bilong ol wokman.

Tasol long hap tu ketering Kampani wantaim Ramu NiCo i laik lukim ol lokal pagraun i groim moa kumu na gaden kaikai na saplaim long mes. Dispela bai helpim ol lokal pipel long kisim mani long helpim sindaun bilong ol long ples na haus-lain bilong ol wantaim famili na komyuniti bilong ol.

135 KM Slurry Pipeline



Hunters i daunim ol Bears wantaim 7-pela trai

PAPUA Niugini SP Hunters kalap i go kisim namba tu ples long lata bilong Intras Supa Kap bihain long ol i bin daunim ol premia, Burleigh Bears, 42-6 long Gold Coast, Australia, na i winim Kokoda Kap.

Ol Bears i opim trai long namba 3 minit, we Kurtis Rowe i putim trai. Keanua Te Kiri i no painim hat long

putim konvesen i go insait na skruim skoa i go antap long 6-0 poin.

Tasol, ol Hunters i bekim trai bilong ol wantaim 7-pela trai we senta pilaia, Adex Wera, i putim 4-pela trai.

Ase Boas i kikim 6-pela konvesen i go insait bilong ol 7-pela trai na em i bin skruim wantaim wanpela penelti kik.

Tupela trai bilong ol

Hunters i kamap long namba wan hap bilong resis na 5-pela trai i kamap long namba tu hap we ol Bears i painim hat long bekim trai bilong ol Hunters long as-ples bilong ol.

Wartovo Puara Jr, David Loko na Karo Kauna Jr i putim wan wan trai na kik bilong Boas i kamap namba wan tru.

Jambert, Vui na Nelson i OJU sempionsip

PRESIDEN bilong PNG Judo Federesen i makim Papua Niugini na i go long 2017 Osenia Judo Yunion (OJU) bai kamap long 28 Epril i go inap long 30 Epril, long Nukualofa, Tonga.

Tupela etlit husat i go wantaim Jambert em Kinsley Vui na Ashaan Nelson. Ol i lusim kantri long las wika Sande na i go kamap long Tonga long Tunde, Epril 24. Vui bai resis long 73 kilo-

gram divisen na Nelson bai resis long 66 kilogram di-visen.

Ol i lukluk long dispela tupa-ela etlit husat bai go pas long judo resis long Tokyo 2020 Olimpik.



Ashaan Nelson long lep han na Kinsley Vui i go long 2017 OJU Sempionsip.

Netbal resis bilong ol Miks na Man i stat



Netbal resis i kamap long Rita Flynn pila graun long las wiken.

NETBAL Asosiesen bilong ol man na PNG Miks i stat long las wika Fraide long Rita Flynn pilaia graun.

Presiden bilong ol junia divisen, Micah Vaira, i tok olsem 20 tim i bin rejista em i bilip olsem tim bai go antap moa long 20.

Vaira i tok, "Resis bilong

dispela yia bai kamap orait bikos las yia mipela i gat 12 tim i resis na nau em i go antap long 20. Mipela i ting olsem planti moa tim bai re-jista long dispela sisen.

"Traim resis bai kamap insait long tripela wiken, bipo long Propa sisen bai stat," Vaira i tok.

Ol divisen insait long 3-pela resis em Man, Premia Miks, Sosal A, Sosal B na Sosal C.

"Mipela bai lukluk long ol traim resis na putim ol wan wan pilaia long ol wan wan divisen," Viara i tok.

Fainal resis bai kamap long Julai.

Hunters tim i kam bek wantaim Kokoda Kap



Ase Boas na Jamie Dowling i sanap wantaim Kokoda Kap.

SP PNG HUNTERS i kam bek Mande bihain long raun 8 resis egensim ol Burleigh Bears.

Pilai bilong ol Hunters long las wiken i kamap namba wan tru long Pizzey Pak, asples bilong ol Bears.

Ol Hunters i winim Kokoda Kap bihain long ol i daunim ol Bears, 42-6.

Kosa bilong ol Hunters, Michael Marum i amamas long tim i soim gut kala bilong ol na i tok olsem ol Bears i putim wanpela trai tasol bikos banis bilong ol Hunters i strong tumas.

Liklik namba bilong ol pilaia i kisim sampela liklik bagarap long resis i kamap long wiken i go we i luk

olsem ol bai no inap pilai long dispela wiken.

Hunters i winim bek Kokoda Kap bihain long wanpela yia em i bin stap wantaim ol Bears.

Ol i kolim Ase Boas em i ANZAC Pilaia bilong ol Hunter taim poro wan Kumul, Luke Paige em ol i kolim ANZAC Pilaia bilong ol Bears.



Ol Kokoda Kap wina, SP Hunters, i sanap bung wantaim bihain long ol i bin winim resis.

Hunters i makim 20 man skwat

SP HUNTERS i makim 20 man skwat bilong raun namba 9 resis bai kamap long Nesanel Futbal Stadiam, asples bilong ol Hunters, egensim ol Northern Pride long Sarere.

Ol i makim Paul Wawa long kisim ples bilong Karo Kauna Jnr, na Stanton Albert NA Moses Meninga i kam bek bihain long tupela i kisim bagarap kosa i makim tupela long 20 man skwat.

Adex Wera, husat i putim 4-pela trai long las wika resis em ol i bin putim em long

ripot long em i bin kisim wanpela strongpela takol, tasol ol i bin tok orait long em long pilai long senta posisen bilong em. Bland Abavu bai pilai long wing and Stargroth Amean bai pilai fulbek.

Kosa, Michael Marum, i tok ol bai makim fainal 17 bipo long ol bai statim resis long 3 klok apinun.

Ol 20 man skwat em;

- 1 Stargroth AMEAN
- 2 Bland ABAVU
- 3 Israel ELIAB

- 4 Adex WERA
- 5 Paul WAWA
- 6 Ase BOAS – Kepten
- 7 Watson BOAS
- 8 Henry WAN
- 9 Wartovo PUARA Jnr
- 10 Esau SIUNE
- 11 Nixon PUT
- 12 David LOKO
- 13 Wellington ALBERT
- 14 Radley BRAWA
- 15 Willie MINOGA
- 16 Enock MAKI
- 17 Stanton ALBERT
- 18 Butler MORRIS
- 19 Ismael BALKAWA
- 20 Moses MENINGA



Ol pilaia bilong Taragau i wilwilim stret pilaia bilong Difens long Pot Mosbi Ragbi Lig resis bilong long wiken.
Ol poto: Nicky Bernard



Man i save stiaim pilai bilong Tigers i mekim wanpela kik taim pilaia bilong Magani i ran kam long stopim em.



Pilaia bilong Sentral Bomas i redi long kikim bal taim pilaia bilong Difens i ran kam long stopim em long AFL pilai bilong ol long Colts graun.



Pilaia bilong Bomana Cats i traim long pasim bal tasol tupela pilaia bilong Gordons Kokofa i kam stopim em long pasim bal. Tupela tim i mekim gren fainal pilai bilong 2016.



Tim Kokopo bilong ol meri i mekim ol meri Mosbi i ai op long Nesenel Sofbal Sempionsip long Kokopo long Ista wiken.



Tim ENB i traim laki tasol i no mekim tru long fainal.



Tim ENB Gazelle meri i go long kwata fainal na lus long Kokopo.



Tim ENB Gazelle man i simelim fainal tasol i sot namel.



Namba 2223

Lukim websait
bilong mipela

www.wantokniuspepa.com

April 27 - Me 3, 2017

WHITE TUNA FLAKES
DIANA White



WHITE TUNA
insait
K 2.20



Tasty and Flavourful White Tuna for Everyone!

PROUDLY
MADE IN
MANUFACTURED BY:
RD Tuna Canners Ltd.



Hunters i daunim ol Bears

PAPUA Niugini SP Hunters kalap i go kisim namba tu ples long lata bilong Intras Supa Kap bihain long ol i bin daunim ol premia, Burleigh Bears, 42-6 long Gold Coast, Australia, na i winim Kokoda Kap.

ridim stori long pes 26

Adex Wera i ran strong egensim tupela pilaia bilong Burleigh Bears. Wera i bin putim 4-pela trai long ol 7-pela trai bilong ol Hunters.



Be CONFIDENT!

With Laurier Feminine Sanitary Products

Good Products, Better Prices, ikam long

Johnstons Pharmacies Ltd

P.O.Box 1066, Boroko, Papua New Guinea.

Tel +675 325 3185 Fax +675 325 0190 Email sales@johnstons.com.pg